


民國叢書

第四編

• 94 •



民國叢書

第四編

· 94 ·

綜合類

春覺齋著述記

貞文先生學行記

林氏弟子表

畏廬文集

畏廬續集

畏廬三集

畏廬詩存

朱義胄述編

朱義胄述編

朱義胄述編

林紓著

林紓著

林紓著

林紓著

上海書店

貞文先生學行記卷一

林畏廬先生學行譜記四種之二

潛江朱義胃述編

先師畏廬林先生。名德伏一世。而凡聲聞所至。謗乃隨之。於呼。居今之世。而好古之學。樂行古道。豈惟知之者少。而直道莫存。知之弗相輕謗者彌少也。吾親炙先生之教。在文學會時。所受諸先生者。與當日諸友齊。未嘗有殊聞特獲。獨念先生爲人。篤倫理。崇節貞。憂世衛道。既歿乃已。其與人也。熱情蓋繇天授。生平好濟難厄而勇赴義。於國家忠愛。血性恆流露語文間。自棄舉業。迺專其力於古文。任京師各學堂講席。士皆化其誠摯。偶譯西方說部。海內風動。雖胡適郭沫若周作人諸人。力倡新文。而於先生獨頌。首頌讚。尊崇隆至。胡氏之言。以先生爲介。輸西方近世文學第一人。傳譯小說。自具風味。於原書談諧風趣。往往刻意深會。而更出其氣力。益發精采。以古文譯說部。其成功最爲大。古文之用。自司馬遷以來。未有如先生者。原文見胡適最近五十年學之文郭氏之言。稱先生譯文簡潔。每使原書。遽增無窮光芒。評迦茵小傳語周氏則自云初之譯小說也。受先生影響巨。原語見點滴序又某之言。以先生既歿。凡昔之仇者敵者。乃始平其心。靜其氣。公允求識先生之善。與其三十餘年戮力成功之偉。邦人嚮慕於西方風土民性。或且駭疑其俗之多異。自先生傳譯衆籍。於是士大夫。始憬然於歐美之有家庭倫理。猶吾也。其社會風土民性。皆與吾相近似。初非絕異也。自先生介輸名著無數。而後邦人始識歐美作家司各德。迭更司。歐文。仲馬。哈葛德之名。自先生稱司各德。迭更司之文。不下於太

史公。然後乃知西方之有文學。由是而曩之鄙視稗官小說爲小道者。及此乃亦自破其繆囿。屬文之士。漸乃敢以小說家自命。而小說之體裁作風。因之日變。迺譯世界文學之風。亦日熾。此皆先生導倡不朽之功。國人未之能忘者也。先生文章。又善寓其愛國熱烈逾恆之情。年雖暮而猶弗稍衰。其培植新思潮。新文學也。亦緣此熱情耳。觀其中年治生。授徒譯書。晚歲更鬻畫以自贍其家計。雖友朋門生多顯貴。而獨以自食其力爲甘。未嘗屑納不勞而獲之金。越七十齡。而猶屹立畫案前。日可六七時。勞作不少休。蓋近世清介絕羣之學者。於呼。天下之名。從未可以傲倖致者。况欲質諸百世而不泯滅。自新思潮新文學之說。囂騰於世。而世之學風世習。乃至政教。罔不靡然態變。猶河漢江海之受颶風。掀怒濤。而又油然雲作。沛然雨驟。其影響所及。孰能知之。先生挺身而當其敵。則敵之萬矢。集於一身矣。然卒無與於先生名德。今觀諸氏之言。大皆稱先生譯事也。吾所知者。先生蓋博學而多能。先生嘗語吾。生平博覽儒籍諸子百家之書。旁及釋典。下逮稗官野史。久乃反之約。而歸宗程朱。未嘗立門戶也。其於古文辭外。所爲詩詞書畫。亦莫不流傳天下。弗主一宗。有謗之者。奚以易人崇信之心耶。吾纂斯篇。期著公論。於當世名宿。凡與先生唱和投贈之詩文。苟涉先生文行學藝。則必輯錄。其或傳家著述。偶論涉者。亦必窮吾聞見所逮。而四方獵采。若時人著述。猶未梓行。或梓行而流傳未廣。吾尙不及聞見者。則吾力之莫可如何也。昔姚惜抱論學問之事。如入大海探珍異。欲盡搜而無遺。必天下之大愚。禮箋序。吾今甘爲大愚。而莫之能至。聞見囿陋。覽者諒焉。

清史稿本傳

文苑
列傳

曰。林紓字琴南。號畏廬。閩縣人。光緒八年舉人。少孤。事母至孝。幼嗜讀。家貧不能藏書。嘗

得史漢殘本。窮日夕讀之。因悟文法。後遂以文名。壯渡海遊臺灣。歸客杭州。主東城講舍。入京。就五城學堂聘。復主國學。禮部侍郎郭曾炘。以經濟特科薦。辭不應。生平任俠尚氣節。嫉惡嚴。見聞有不平。輒憤起。忠懇之誠。發於至性。念德宗以英主被扼。每述及。常不勝哀痛。十謁崇陵。匍伏流涕。逢歲祭。雖風雪勿爲阻。嘗蒙賜御書。貞不絕俗額。感幸無極。誓死必表於墓。曰清處士。憂時傷事。一發之於詩文。爲文宗韓柳。少時務博覽。中年後。案頭唯有詩禮二疏。左史南華及韓歐之文。此外則說文廣雅。無他書矣。其由博反約也如此。其論文主意。境識度氣勢神韻。而忌率襲庸怪。文必己出。嘗曰。古文唯其理之獲。與道無悖者。則味之彌臻。於無窮。若分畫秦漢唐宋。加以統系派別。爲此爲彼。使讀者炫惑。莫知所從。則已格其途而左其趣。經生之文。樸往往流入於枯淡。史家之文。則又隳突恣肆。無復規檢。二者均不足以明道。唯積理養氣。偶成一篇。類若不得已者。必意在言先。修其辭而峻其防。外質而中膏。聲希而趣永。則庶乎其近矣。紆所作。務抑遏掩蔽。能伏其光氣。而其真終不可自闕。尤善敘悲。音吐淒梗。令人不忍卒讀。論者謂以血性爲文章。不關學問也。所傳譯歐西說部。至百數十種。然紆故不習歐文。皆待人口達而筆述。任氣好辨。自新文學興。有倡非孝之說者。奮筆與爭。雖脅以威。累歲不爲屈。尤善畫山川渾厚。治南北於一爐。時皆寶之。紆講學不分門戶。嘗謂清代學術之盛。超越今古。義理考據。合而爲一。而精博過之。實於漢學宋學以外。別創清學一派。時有請立清學會者。紆撫掌稱善。力贊其成。甲子秋卒。年七十有三。門人私謚貞文先生。有畏廬文集、詩集、論文、論畫等著。

聞清史稿初決體例。斷代洎遜位而止。故宣統本紀所書。廢及遜位詔下時。此亦援諸史通裁。固無弗當。而列傳。乃人盛宣懷。瑞澂。陸潤庠。世續。伊克坦。梁鼎芬。徐坊。勞乃宣。沈曾植。周馥。張曾敬。馮煦。錫良。辜鴻銘。王闓運。王先謙。梁濟。簡純。

譯王國維及先生之傳。先生與諸人。皆人民國後始卒。爲之立傳。是自亂其例。且既爲明遺民立傳。則傳清遺民。當待來史。或曰。此出金梁一人之見。主司纂政者。皆莫若何。按先生本傳。猶於生平未能曲盡。

福建通志。陳衍撰先生傳曰。林紓字琴南。號畏廬。原名羣玉。閩縣人。世居南臺。囂塵閭閻中。而自少刻苦力學。強記多聞。爲駢文。慕王曇金應麟。爲古今體詩。追吳偉業。陳恭尹。能畫。能經世文。才名噪里黨。與林崧祁。林某有三狂生之目。久之一切棄去。治古文詞。祁嚮桐城諸老。寢饋昌黎。自謂善闕抑蔽匿。當伯仲杵湖柏枧。或翹其闕。則勃然怒於言。先緒壬午舉於鄉。屢困公車。大挑用教諭。乃旅食杭州。順天府尹陳璧招主五城學堂講席。因教授京師大學。自是淹都下廿餘年。以文藝傾動顯者。論者方諸近人王闓運云。初紓與長樂高氏兄弟鳳岐而謙。鳳謙敦昆弟歡。鳳岐而謙歷佐東諸侯幕。有聲。與紓相引重。而謙摯友王壽昌。精法蘭西文。紓與同譯巴黎茶花女小說行世。中國人見所未見。不脛走萬本。旣而鳳謙剽商務印書館。則約紓專譯小說。歲若干萬言。前後都百餘種。畏廬詩文稿泊各雜著。亦代印代售。分館百十處。風行便利焉。紓遂譯旣熟。口述者未畢其詞。而紓已書在紙。能限一時許。就千言。不竄一字。見者競詫其速且工。然屬他文。亦坐此率易命筆矣。性勤事。不少休。賣文譯書外。肆力作畫。自珂羅版書畫盛行。雖家乏收藏。不難見古名人真蹟。珂羅版者。西法用藥水傳玻璃照印。字畫毫髮不爽。紓用得飽臨四王墨井南田。上及宋元諸大家傑作。駸駸擅能品。沽者麤至。幀直數十餅金。紙絹塞屋。益以版稅版權。歲入鉅萬。版稅者。以著作稿交書坊代印。每部分其價十之幾。版權者。以著作稿售書坊。每若干字價若干。他不問也。紓有書畫室。廣數筵。左右設兩案。一案高將及脅。立而畫。一案如常。就以屬文。左案事畢。則就右案。右案如之。食飲外。少停晷也。作畫譯

書。雖對客不輟。惟作文則輟。其友陳衍嘗戲呼其室爲造幣廠。謂動卽得錢也。然紆頗疎財。遇人緩急。周之無吝色。(下略)

吳汝綸讀先生之文。稱曰。是抑遏掩蔽。能伏其光氣者。語見畏廬續集送馬通伯先生序。清史本傳亦云。

桐城吳先生日記品藻編曰。伊藤問漢文高師。告以林琴南孝廉紆。又曰。閱林琴南孝廉文。多可喜者。宜時賢共推能手也。按吳先生。卽汝綸。所謂伊藤者。日本明治朝宰相伊藤博文也。

高鳳岐撰清封宜人林母陳太宜人墓志銘有曰。紆於壬午領鄉薦。適有某公者。歲以千金辟爲佐。太宜人心弗善。紆時方困。卽慚悚不敢受聘。又曰。乙未五月。太宜人寢疾。其冬十月二十七日卒。壽六十有七。六閱月中。紆戢足弗出。顏色灰墨。行百餘步且仆。余省其爲太宜人憂也。又曰。紆性堅忍。讀書治古文。日益有聲。自余友紆十五年。未聞敢爲非義。秉母訓也。

又與先生書。評迦茵小傳曰。此書。時時用柳州生峭之筆。又時時有東坡文字之光。其見氣節。見神采處。皆以凜凜之筆出之。又曰。吾敢斷言此書。自摯甫去後。亦唯我能看澈。能知作者本領之到那許地步。又與書有曰。畏廬絕有癖氣。極肯服善。

又自梧州寓書先生。而述岑春萱之言曰。琴南高士。又曰。岐爲西岑述公不見某公。某公求畫不答。如何聽講。相見如何。某執政。設席相要。諸人皆至。而公獨不至。西岑大笑。以爲是果琴南性質。坐客亦大笑不已。岑春萱字雲階。廣西某縣人。時官清兩廣總督。又與書有曰。雲帥心赤而氣盛。故與兄氣味相近。按所云雲帥。卽岑春萱也。又與書曰。足下心中不著

一物。

又自海上與書有曰。足下此數年在京。有古文家名譽。有新學界著述。又無墮行。此固第一好消息。又與書曰。我平日慙氣。爲足下所痛罵。然亦據事據理。並非故以氣凌人。按風岐各次與書。其年月皆不可詳。可惜也。

陳寶琛答議私諡箋。清白守節曰貞。道德博聞曰文。

郭曾炘答議私諡書。略謂畏廬先生。文章節操。海內共欽。樂育英才。尤具熱腸古誼。諡之貞文。確當無倫。

又亥既集和先生夢謁梁格莊梓宮作。有句白。杜鵑再拜千行淚。寂寞詩人自感恩。讀先生致某君札曰。退之八代扶衰手。壓卷終推原道篇。舉世方淪洪水厄。大書真可國門懸。把茅佛祖能訶罵。寸管乾坤看轉旋。茹鯁因君聊一快。年來噤口似寒蟬。

又題義甯所藏先生詩冊曰。杜鵑再拜悲臣甫。朱鳥招魂哭魯公。殘淚已爲君友盡。高歌青睞意無窮。

梁鼎芬題先生畫背曰。林紓天下第一流。

康有爲答先生續萬木草堂圖詩曰。譯才竝世數嚴林。百部虞初掇世心。喜賡靈光經歷劫。誰傷正則日行吟。唐人頑豔多哀感。歐俗風流所入深。多謝鄭虔三絕筆。草堂風雨日披尋。

樊增祥題先生綴玉軒話別圖詩有句曰。琴南畫意重千金。又題先生續南湖舊隱圖曰。光緒而還畫手難。

惟君刻意擬荆關。琴南畫著琴天句。知是閩山是楚山。按樊詩後。有畏廬老兄作此圖。仿潘畫王題之例。屬余賦詩。欣然作此。天堯琴天閣主樊嘉題諸語。

周樹模答議私諡書有曰。林畏廬先生。品節文章。門下宜立私諡。又曰。按諡法清白守節曰貞。道德博文曰

文。謚爲貞文。宜也。

又題義甯所藏先生詩冊曰。畏廬吾所敬。悟園吾所賞。文字特一鱗。時作真龍想。

又先生篋室楊宜人五十生日贈詩曰。團焦雪裏解思親。羅綺叢中每避人。能與逋仙成眷屬。梅花依約是前身。

左紹佐題先生詩冊有曰。先生九謁崇陵。庶幾乎亭林老人之用心。至於開明學說。屏斥淫辭。挽狂瀾於既倒。則孟韓之事也。

陳衍石遺室詩話卷三曰。吾鄉同輩之爲詩者。又有沈愛蒼撫部瑜慶。林琴南孝廉紆。皆不專心致志於此事。然時有可觀者。又曰。琴南號畏廬。多才藝。能畫。能詩。能駢體文。能長短句。能譯外國小說百十種。自謂古文辭爲最。沈酣於班孟堅韓退之者三十年。所作兼有柏枧枰湖之長。而世人第以小說家目之。且有深詆之者。余常爲辯護。謂曾滌笙所分陽剛陰柔之美。雖不過言其大概。未必真劃鴻溝。然畏廬於陰柔一道。下過苦功。少時詩亦多作。近體爲吳梅邨。古體爲張船山。張亨甫。識蘇戡後。悉棄去。除題畫外。不問津此道者。殆二十餘年。庚戌辛亥。同人有詩社之集。乃復稍稍爲之。雅步媚行。力戒甚囂塵上矣。今先錄題畫者數首。已與吳仲圭。王山農。沈石田諸人相彷彿。高者可追文與可。米元章。又卷五曰。前歲畏廬避地天津。忽發憤大作詩。自命杜陵詩史。又卷十二。載辛亥詩社舊慈仁寺看松。瓊公詩句曰。林叟十指有松氣。胸中一幅參天黛。林山腴思進詩句曰。林翁支離叟。畫筆泣真宰。懸知柯節成。胸中蟠硯硯。詩含古松氣。羣公肅文采。佇

看梅鶴姿。松間各雌雌。又卷二十一曰。畏廬近遊江南回。囊中出新詩數首。曲折取勢中。意極貫注。卷二十六曰。畏廬近來詩境大進。在自然不假做作。自都門寄余福州詩。詩今未錄承接轉捩處。殊見手腕。是以文家畫

家法作詩者。君尙有詠史五古十餘首。寓意時事。極爲工切。自謂仿余作法。余實不如其隸事之淵博也。卷

二十九曰。光緒初年。福州有三狂生。皆林姓。一畏廬。一述菴。一某。述菴乙酉舉於鄉。早卒。卷三十載鄭

守堪弔先生詩句曰。一代畫師入能品。百家詞派洗閩人。按林思進字山映四川華陽人官清內閣中書著有清寂齋集鄭守堪名宗霖福建福安人

近代詩鈔引石遺室詩話曰。述菴少與林畏廬紓及林某在里中有三狂之目。所爲詩皆祈禱吳梅村黃仲

則諸家。畏廬老而棄其少作。又引曰。畏廬自謙其詩。謂少作已盡棄斥。近年始專學東坡簡齋二家七言律。

余謂題畫諸絕句。有突過大癡雲林者。未可盡棄也。

石遺室詩集卷一有長句一首贈林琴南曰。林生年少負狂名。與我相逢已長大。君言識我亦良早。貧賤驕

人此人那。酒酣耳熱話童時。折節讀書誰督課。斬蛟射虎百不憂。鄉里齷齪橫作選。臺江駟僮本如鯽。酒惡

情懷輒罵座。世人白眼盡欲殺。每值毵毵暗相賀。我識君才已二年。講院曾窺珠玉唾。駢文酣似洪北江。小

言詹詹亦偶作。昨讀我詩袖之去。旬月不還若奇貨。謂將肆力古文辭。詩非所長休索和。癸未年卷三有爲林

琴南題巴黎茶花女遺事後曰。曾論懿德回心院。西土重生加他鄰。事到無聊說因果。夫人汧國定前身。亥

年。又有再次韻贈琴南曰。閩南故人林古度。燕市故態猶荆軻。大文寫定似柏枧。佳畫投贈過新羅。十日數

面語未了。六年一聚生幾何。胸中千卷致斌媚。須髯如竹隨緣坡。癸卯年卷五有題畏廬畫四首曰。此地非桃

源。此牛非戴嵩。所以牛目中。了不見牧童。其一。韜光竹在地。雲棲竹在天。誰知古西冷。水竹自娟娟。其二。秋色無聲詩。秋聲有聲畫。中有讀書人。秉燭聽澎湃。其三。頗似雨花臺。落日戍樓楮。謾謾松風寒。瀟瀟鳴泉瀉。其四。又有祕魔厓書竹坡先生題字後示畏廬曰。尙餘二客話山邱。卅載門生共白頭。絕似平山堂下過。龍蛇飛動壁間留。又有歲暮懷人絕句曰。畏廬畏亂復畏貧。稚子旁妻避析津。飄泊干戈曹霸手。鋪張排比杜陵人。以上二詩皆辛亥年。卷六有畏廬自津門寄畫。酷肖匡廬。直逼墨井。賦謝二首曰。廬阜忽當前。千巖壁上懸。香爐望五老。瀑布下開先。寫子經過景。牽余信宿緣。漁山如可作。不敢倚前賢。其一。四壁家徒立。自注：避亂歸。所有書畫盡寄都門。思君畫幀懸。打門來急遞。坐客覩爭先。夢寐通幽賞。亂離增墨緣。前賢猶襍檢。何況汝時賢。其二。又有風疹久不愈。腹疾愈而復作。殆將死矣。倒次畏廬韻。戲示醫隱畏廬曰。怪余忽與鬼爲鄰。十六年來不病身。死使我埋休我殯。散知何果聚何因。一瓢天士都無策。墨井耕烟正亂真。他日兩家求作傳。能文後起更誰人。又次韻答畏廬曰。幾人華屋不山丘。爾我垂垂况白頭。從古畫師原必壽。近來詩力抑何遒。少微星隱非吾事。續命湯多或小留。自笑歸舟天際去。有誰凝望倚粧樓。自注：反言。調畏廬。又有畏廬畫松。易吾楊惺吾楹帖。時余將出都。遲朝風雨淒然。若傷別者。因書畫後曰。畏廬酷嗜楊風字。五字楹聯尤當意。要余持贈酬以畫。雙榦盤擎慈仁寺。下筆瀟瀟風雨來。高寒六月生虛齋。由來松竹解傷別。試讀逍遙堂上詩。又有題畏廬畫曰。此亦斜街秀野堂。春光過盡看秋光。不知明歲攤書處。可有蕭疏樹幾行。再題曰。似我蕭閒室。煩君點筆新。如何居一叟。不見戴花人。又有次韻答畏廬送行之作曰。津門昨歲恨分裾。已分長乘下澤車。世亂敢期踪跡密。情

親肯任簡牋疏。買田種秫將諸價。假館傳經待卜居。

自注：幾道請余續就大學講席。

第一老來真樂事。故人共讀古人書。

以上七詩

皆壬子年

卷七有畏廬寄詩題匹園新樓次韻曰。敢云隱几日看山。只擬千忙博一閑。聯扁分書已坡谷。畫圖傳

本待荆關。誰知五柳孤松客。卻住三坊七巷間。循例吾家懸榻在。何妨上冢過家還。

丁巳年

卷八有畏廬書來。

力勸省食。報之以詩曰。平生自負沈家脾。數十年來已就衰。遠道故人相切戒。屠門大嚼甚非宜。兩餐牛液

濃於乳。一飯魚膾爛似糜。食愈省時身愈健。謹當如教審行之。

戊午年

又十七年九月與義胄書有曰。文微爲畏廬生平得力所在。與所著韓柳讀法各本異曲同工。

書載文微附錄。

鄭孝胥海藏樓詩有題畏廬所寫江亭餞別圖曰。諸賢送嚴子。各有傷時意。林子序且圖。下筆帶遠思。又傷

壽伯莠仲莠有句曰。高林奮筆傾酸淚。張卓函書帶戰塵。

自注：謂庚子京師陷。伯莠兄弟仰藥。嘯桐琴南。卿余芝南與予書。皆以賜卹不及爲恨。

又有贈畏廬

詩曰。文如至寶丹。筆若生薑曰。一篇每脫藁。舉世皆俯首。平生不屈節。肝膽照杯酒。紛紛野狐羣。忽值師子

吼。京師奔競場。暮夜孰云醜。畏廬深可畏。斧鉞書在口。隱居名益重。方使薄俗厚。奈何推稗官。毋乃褻此叟。

斂才偶作畫。石谷輒抗手。亦莫稱畫師。掩名究無取。

沈瑜慶濤園詩集有得高鳳岐赴寄唁其二弟兼示畏廬與石遺曰。江亭爲位哭。公靈宜質旁。鄉信來白雁。

客夢熟黃梁。天涯老同叔。初平尋裹糧。雪涕林與陳。奠醑同傾囊。

嚴復癡癡堂詩集有題畏廬晉安耆年會圖曰。長笑昌黎說霜菊。苦言既晚何須好。微生蜂蝶幸遭逢。復云

婉孌死相保。紓也壯日氣食牛。上追西漢摛文藻。十年大學擁皋比。每被冬烘笑頭腦。虞初刻露萬物情。東

野受才遜雄鰲。興來鋪紙寫雲山。雙管生枯兼潤燥。自言得法自吳王。墨井石谷定價百金酬一藁。文章藝事總

延年。六十容顏未枯槁。苦遭惡俗不相放。兒童項領欺華皓。歸來洛社聚耆英。抵制少年老。吾老。豈知世運

久更新。骯髒人生苦不早。君看畫裏十三人。一已墓門將宿草。自注林君伯穎已於七月化去不如及早豎降旗。成功者退

循天道。更將此意問橘叟。自注會長渠指歲寒松合抱

宋小濂答議私諡書有曰。畏廬文章行誼。均應諡法。士君子以行爲先。首擬貞文爲得。

又賀先生遷居詩曰。淵明昔移居。南村得仁里。素心時往來。言笑忘我爾。君今徙北隣。亦爲擇其美。居近海王邨。百城不盈咫。搜討供覽觀。縱橫罪業几。滿天風雪寒。閉戶惟求己。著書已等身。勤勤尙無已。擺落山海經。貫穿世界史。有時開講筵。侍坐二三子。述作探古先。文學闡微旨。正聲撞黃鐘。鏗鏘警俗耳。我欲升君堂。斯文衰共起。

張僖序畏廬文集有曰。畏廬。忠孝人也。爲文出之血性。又曰。稍檢其行篋。則所攜者詩禮二疏。春秋左氏傳。史記。漢書。韓柳文集。及廣雅疏證而已。畏廬無書不讀。謂古今文章。歸宿者止此。余不敢引畏廬之言。斷天下文章之奇。果止於此也。然竊觀畏廬。每取篋中書。沈酣求索。如味醇酒。則知畏廬之枕籍於是深矣。又曰。畏廬文字。強半愛國思親作也。又曰。畏廬不仕。牋牒詔令諸門。安能責無而爲有。又生平惡考據煩碎。夙著經說十餘篇。自鄙其陳腐。斥去不藏。稿中頗具各體。獨經說及官中文字闕焉。

李宗禕贈先生詩曰。斯世無大文。撫拾紛綺藻。羣然相爲豪。亦足干大造。南山有君子。著書鹽其腦。道與時

世違。旦夕傷懷抱。桃李不終春。松柏多壽考。君爲萬年枝。勿爲斷腸草。

錄自近代詩鈔

又雙辛夷樓詞。偕先生登越王臺。調水調歌頭有曰。眼前景。不弔古。已堪哀。倚闌長望。鬼火簇簇跨山來。又

曰。但醉。且休問。與爾盡餘杯。

讀此知先生與友朋憤念國仇之深。

卓孝復題先生晉安耆年會圖詩曰。釣龍臺畔與君游。四十年來各白頭。此會那堪興俯仰。橫流未忍計沈

浮。樽前腰腳誰稱健。圖裏園林總覺秋。偷得閒身在人海。西風謾謾倚高樓。

馬其昶序韓柳文研究法有曰。今之治古文者稀矣。畏廬先生。最推爲老宿。其傳譯稗官雜說徧天下。顧其所自爲者。則矜慎斂遏。一根諸性情。劬學不倦。其於史漢及唐宋大家文。誦之數十年。說其義。玩其辭。醇醇乎其有味也。又曰。陵谷變遷矣。而先生之著書談文如故。又曰。世之小夫。有一得。輒祕以自矜。而先生獨舉其生平辛苦以獲有者。傾困竭廩。唯恐其言之不盡。後生得此。其知所津逮矣。

命子根偉答同門議私諡書有曰。考之逸周書諡法解。清白守節曰貞。勤學好問曰文。以諡畏老。允稱生平。姚永概序畏廬續集有曰。若畏廬者。殆余所謂可信者也。又曰。余知畏廬深。其性情。真古人也。畏廬名重當世。文集已印行者。售至六千部之多。雖取法韓柳。而其真仍不可掩闕。又曰。私念畏廬與余。生際今日。五六十年來所聞見。多古人所未嘗有。區區抱孤旨於京師塵壒之中。引述自遠。雖頽廢而不悔。

慎宜軒詩集卷八。有謝畏廬與徐樹錚諸人邀泛淨業湖詩句曰。畏廬文字筆嶢巖。又有答畏廬詩句曰。君以無田歸未得。

高夢旦序畏廬三集有曰。畏廬之文。每一集出。行銷以萬計。且所著譯百五十種。都一千二百餘萬言。久已風行海內。自不待助而傳。又曰。伯兄爲畏廬摯友。日以道義相切劘。畏廬每就一文。必商之伯兄。時以一字一句之爭。斷斷無已。又曰。念畏廬行年七十又三。精健如昔。自言少時博覽羣書。五十以後。案頭但有詩禮二疏。左史南華及漢書韓歐之文。此外。則說文廣雅。無他書矣。其由博反約也如此。而敘悲之作。音吐悽梗。令人不忍卒讀。蓋以血性爲文章。不盡關學問也。

成多祿答議私諡書有曰。先生之文。人所共知。惠則人所未知。

閩人陳熙績序歇洛克奇案開場有曰。吾友林畏廬先生。夙以譯述泰西小說。寓其改善社會。激勸人心之雅志。自茶花女出。人知用情之宜正。自黑奴籲天錄出。人知貴賤等級之宜平。若戰餘血腥。則示人以軍國之主義。若愛國二童子。則示人以實業之當興。其餘亦一部有一部之微旨。總而言之。先生固無浪費之筆墨耳。

林崧祁觀先生作石。頗有所悟。作詩曰。渾沌乾坤鬱古胎。雲根歷劫委蒼苔。偶描色相存真品。大露鋒稜已不才。千古石交有頑鐵。一燈禪悟啓靈台。空山獨抱風霜感。可有情天待補來。錄自近代詩鈔

趙熙有懷畏廬詩曰。養生餘事託荆關。亂後今知鬢盡斑。一飽一飢留命在。古心古貌立人閒。遺民汐社偕陳鄭。列國虞初鑄馬班。四海不知埋骨地。祝公娛老八閩山。自注。傳聞有歸計。又調畏廬詩曰。柏枧雄文自注。石遺論定。石谷圖。十年風味識林逋。堂堂老子還稱霸。自注。王霸也。見石遺書。歲歲添丁直跨盧。何福藍田將玉種。近鋤明月買花

無。如公不負陰行善。壁取榴房得蚌珠。

趙熙字堯生。別號香宋。四川榮縣人。清翰林。官御史。著有香宋詩集詞集。

黃侃題先生詩冊曰。侃以己未秋。初見先生於京師酒樓。時先生方騰書攻擊妄庸子之居國學。而翹邪說者。侃亦用是故。棄國學講席。南還。先生見侃。所以獎掖慰薦之良厚。每心佛自北來。必寄聲垂詢。侃甚感焉。冒廣生小三吾亭詩卷八。有臨淮軍中喜晤琴南曰。北來夢寐訪林逋。失喜相逢共道塗。一別話從經歲間。二難月與故人俱。披襟尙濕龍湫雨。發篋先商雁蕩圖。芳草明年江岸長。還能攜酒聽鸚鵡。自注。琴南新游雁蕩歸。又有琴南約泛舟二閘。作詩有句曰。平生林處士。簑笠煙波徒。十年客長安。頗厭京塵污。

齊璜白石詩草卷二有題林畏廬畫幅曰。如君才氣可橫行。百種千篇負盛名。天與著書好身手。不知何苦向丹青。又有畏廬先生七十生日。畫梅壽之。並題詩曰。韓子文章妙衆官。換人凡骨勝金丹。此翁合是傳人未。著萬篇書在世間。

荻葆賢平等閣詩話卷二曰。閩縣林琴南先生紓。惓惓忠愛。篤尙風義。余曩遇之京師。塵談竟日。讀其畏廬文集。語似韓柳。善畫。喜用濕筆。得王廉州神理。貧居自隱於小說家。世遂以此稱之。未足盡其生平也。茲從友人處。覓得其七律數首。亟錄存此。自題江行覓句圖送楊昀谷太守之蜀中云。生平不識嘉陵道。卻寫夔巫上峽舟。爲愛詩人能作郡。聊將畫卷記清遊。從今編集多新語。沿路聞猿及早秋。日日推篷山色在。應無餘地著離憂。同高婉室過伯荊光祿墓下云。夙言殉國定誰先。果踐斯言詎有天。萬事還君無見好。此來及我未衰前。荒田迎面餘雙碣。自注。墓在麻田中。新檜齊眉可五軍。同奠尙餘高子在。方侯墓草已芊芊。自注。雨亭下世二年矣。

邯鄲道中云。入間那得九還丹。往事黃梁足笑嫻。行客仍然夢富貴。先生今日過邯鄲。雪光一白連荒裔。鴉點紛來赴暮寒。聞道過江山色好。道中未計歲將闌。先生詩學宋人。多性靈語。傷亂述懷。真入少陵之室。而藁多焚棄不傳。曾見有閩中新樂府。甚佳。今不復記憶矣。扶葆賢字楚青。號平子。江蘇溧陽人。

陳聲暨除夕過先生寓齋。留飲。賦長句二十韻。曰。歲闌獨客孰好我。出門乞食非饑驅。畏廬丈是我父執。喜我突至掀其須。下階相將入畫室。示我東絹方染濡。興酣須臾能事畢。怒罵餘子兼揶揄。就中座客盡閩產。落寞彈鋏知無魚。我丈和煖陽春懷。廣廈何以顏歡渠。求田問舍力不毅。稻粱自笑爭雁餘。三椽矮屋似僧舍。家寄居城東隅。季鷹秋風思鱸膾。東坡臘日懷妻孥。修蛇赴壑又歲盡。顧影能免悲桑榆。長官聽直任陞楮。有司出納逢侏儒。侏儒棄甲歌復來。陞楮脫巾空譟呼。開源節流兩無策。中夜起坐千躊躇。燕巢幕上定非計。菀枯枉用歌烏烏。衆人待我我自省。儒無席上珍誰沽。我丈閉門能造車。譯書賣畫勤菑畬。貨財筋力兩爲禮。舉火功德瘡浮屠。我今從丈飲屠蘇。燔柴風味疑鄉閭。性不能飲識酒趣。看人百榼還千壺。歸來惘惘自兀坐。鄉心但覺紛起予。此詩載近代詩鈔卷二十四。按聲暨字公荆。衍之子。時官交通部主事。

李經畬題先生詩冊曰。葱葱宰樹認冬青。梁格莊前九度經。髯叟賜廬今尙在。徘徊有客咏榛苓。李經余。字新吾。安徽人。

錢基博技擊餘聞補有曰。技擊餘聞。敘事簡勁。有似承祚三國。以予觀閩侯文字。此爲佳矣。見小說月報五卷一號。○錢基博。字子泉。一字潛夫。江蘇無錫人。

又所撰現代中國文學史上編古文學曰。紆以家貧無所得書。則雜收斷簡零篇。用自磨治。偶發篋。得季父所藏毛詩尚書左傳史記四部殘本。則大喜過望。而熹史記特甚。嘗語人曰。史記之文。純一紀事之文也。然本紀世家列傳中有同時之事。不並敘無以取證。已往之迹。不插敘無以溯源。繁賸之文。不類敘無以醒目。爲箋識。用力頗劬。自十三齡及於二十以後。校閱不下二千餘卷。迨三十以後。得與同縣李宗言交。乃盡讀其家所藏書。不下三四萬卷。強記多聞。爲駢文。慕王曇金應麟。爲古今體詩。追吳偉業。陳恭尹。能畫。能經世。文才名噪里黨。與林崧祁林某有三狂生之目。久之。一切棄去。爲古文。祈嚮桐城諸老。寢饋昌黎。自謂善闕抑蔽匿。當伯仲梓湖。吳敏樹。梅曾亮。或翹其闕。則勃怒於言。又曰。紆讀書能識古人用心。抉發闡奧。又曰。民國更元。文章多途。特以儷體縛藻。儒林不貴。而魏晉唐宋駢騁文囿。以爭雄長。大抵崇魏晉者。稱太炎爲大師。而取唐宋。則推林紆爲宗盟云。按先生所選國文讀本第八卷。六朝文序曰。昭明於梁。臺建後。名流麇集。采擷衆長。歸本正宗。又曰。主月隱竹。秋花不闌。往往手六朝之文。臨窗披閱。胸次爲之廓然。集中所選。皆余平日所窺涉者。據此。則先生未嘗競軒輊於魏晉唐宋。又曰。其詔學者。恆令取選於左氏傳。及司馬之史。班之書。昌黎之文。以爲此四者。天下文章之祖庭也。又曰。其早年論文。崇唐宋。故亦未嘗薄魏晉。又曰。中國有文章以來。未有用以作長篇言情小說者。有之。自林紆茶花女始也。紆迄譯既熟。口述者未畢其詞。而紆已書在紙。能限一時許。就千言。不竄一字。見者競詫其速且工。又曰。自以工爲古文辭。雖譯西書。未嘗不繩以古文義法也。又曰。紆之文。工爲敘事抒情。雜以恢諧。婉媚動人。實前古所未有。固不僅以譯述爲能事也。又曰。以中日之戰。海軍敗績。用叢話厲。傷毀者之例。以一概也。作徐景顏傳。又曰。畏廬之文。初集出。一時購讀者六千人。蓋竝世作者所

罕觀焉。又曰。當清之季。士大夫言文章者。必以紆爲師法。遂以高名入北京大學主文科。又曰。按林紆論文。不薄六朝。論詩。不主江西。不持宗派之見。又曰。紆初年能以古文辭譯歐美小說。風動一時。信足爲中國文學別開蹊徑。又曰。力持唐宋。以與崇魏晉之章炳麟爭。繼又持古文。以與倡今文學之胡適爭。叢舉世之詬尤不以爲悔。然有繫於一代文學之風會者。固匪細。不可不特筆也。性勤事不少休。晚年賣文譯書外。益肆力作畫。自珂羅版書畫盛行。雖家乏收藏。不難見古名人真蹟。珂羅版者。西法用藥水玻璃。照印字畫。毫髮不爽。紆用得飽臨四王墨井南田。上及宋元諸大家傑作。駸駸擅能品。沽者麇至。幅直數十餅金。紙絹塞屋。益以版稅版權。歲入鉅萬。版稅者。著作稿。書坊代印。每書分其價十之幾。版權者。以著作稿售書坊。每千字價若干金。其豐歉壹視其人之聲譽。以爲衡。而版稅版權之所饒益。並世所觀記。蓋有無及紆者也。紆有書室。廣數筵。左右設兩案。一案高將及脅。立而畫。一案如常。就以作文。左案事暇。則就右案。右案如之。飲食外。少停晷也。作畫譯書。雖對客不輟。惟作文則輟。其友陳衍。嘗戲呼其室爲造幣廠。謂動卽得錢也。然紆頗疏財。遇人緩急。周之無吝色。

臧陰松鐵笛亭璣記序有曰。先生著作。浩如煙海。此特其餘事而已。又踐卓翁短篇小說序曰。踐卓翁者。深於情。而能持以正者也。譯西文小說至百餘種。其自爲書亦數種。皆風行海內。又曰。其能款款動人處。閉目思之。亦似確有其事。則翁之善於史漢。故造言之精如是。

陳希彭十字軍英雄記序有曰。嚮者桐城吳摯父先生。與吾師畏廬先生。相見於京師。論古文經日。桐城歎

息。以爲絕業將墜。吾師亦戚戚然憂。故其詔生徒。恆令取徑於左氏傳。及司馬之史。班之書。昌黎之文。以爲此四者。天下文章之祖庭也。又曰。吾師少孤。不能買書。則雜收斷簡零篇。用自磨治。自十三齡及於二十以後。校閱不下二千餘卷。迨三十以後。與畚曾李太守友。乃盡讀其兄弟所藏之完書。不下三四萬卷。於是文筆恣肆。日能作七八千言。然每爲古文。或經月不得一字。或涉旬始成一篇。歷年淘汰。始成文集四卷。又曰。計吾師所譯書。近已得三十種。都三百餘萬言。運筆如風落霓轉。而每書咸有裁制。所難者。不加點竄。脫手成篇。按先生晚歲箋牘題跋。題詩皆如此也。吾恆見之。此則近人所不經見者也。又曰。吾師所作。縱橫激盪。直前無古人。

皦皦子林嚴合鈔序曰。自夫己氏以攬合東語。雜湊成篇之文字。倡導學子。而後進承風。摹倣不已。至沿其膚淺語。率易語。而奉爲金科玉律。繆種流傳。校風漸染。此亦時文後之一厄也。林嚴二先生起而正之。林則辦香桐城。方氏義理。劉氏才思。姚氏神韻。能兼有之。而不規規於法之所在。又曰。林所譯。多稗官家言。獅子搏兔。亦用全力。雖復寓言八九。而敘述所至。關合中事。足資爲鑑戒者。一篇中嘗三致意焉。按前之所言。未能盡得先生文章

之真。後之所言。庶深審乎先生之用心矣。○皦皦子姓王。名文濡。字均卿。江蘇吳縣人。

昔見文學常識一書。載李定夷論小說。引苦海餘生言曰。琴南說部。譯者爲多。然非盡人所可讀也。他人譯說部。常爲原本所泥。而琴南不拘拘於西文。去其贅而補其不足。是傳譯第一要訣也。又曰。觀其說部。一篇到底。有綫索意境。直如爲文。匪不盡心力而爲之。又曰。琴南之小說。不止陵轢唐宋。俯視元明。抑且上追漢

魏。李定夷。字健畝。江蘇昆陵人。○苦海餘生。或謂卽劉錦江也。字里。行業待訪。

李宗緯女慎溶。花影吹笙室詞。有和先生汎湖之作。調百字令曰。越山清絕。泛湖光。中夜翛然孤引。一片玲瓏。驚驟冷。月底楊花吹鬢。漁屋風生。篷窗人悄。誰解聽高均。細波輕漿。睡鷗沙際難穩。長歎繫夢西冷。夷猶片棹。欲去頻無準。聞說交蘆菴外樹。猶恐當年先隱。半雲沈埋。水孤天闊。渺渺游人恨。傳來新句舊愁。平地盈寸。

松江雷晉所纂近人詞錄。有金爲題先生傳譯玉雪留痕。調齊天樂句曰。無邊春色旖旎。借好風吹送。又調金縷曲曰。借丹枕。搭挂人間世。法華輪。一彈指。又題鬼山狼俠傳。調念嬌奴曰。填胸魁壘。探喉憑稗官吐。金爲字鶴笙。浙江山陰人。雷晉未詳。

王蘊章小說雜平曰。林琴南如魯殿靈光。漢宮雅奏。載民國八年小說月報十卷一號。○蘊章字蓴農。別號西神。又號十年說夢人。江蘇無錫人。

張宗楊謝先生贈畫竹詩曰。畏廬老人推善畫。錫我一幅碧琅玕。供我臥遊。獨我疾。清風恍覺生夏寒。我家此物生亂山。別後未卜能平安。自注。家弟不愛竹。常伐而鬻之。安得有此畫中樓。煮茶聽雨來凭欄。按此詩。載近代詩鈔卷二十四。宗楊號楞岩。福建閩侯人。陳衍家僕也。著有鄰岩書屋詩。○以上錄傳志詩詞雜記之文。都五十有四。

貞文先生學行記卷一終

貞文先生學行記卷二

林畏廬先生學行譜記四種之二

潛江朱義胄述編

壽哀之文。必崇實黜妄。若非中蘊誠意。素篤摯情。自然流洩於翰楮。則辭況斷不易工。非文樸而義檢。則立言必無可信。至於浮藻濫諛。餽飭敷塞。千篇雷同。觀者益厭之矣。昔人總集。於投贈文字。雖有取錄。而抉摭必嚴必精。罔稍假借。豈唯祛妄汰濫。亦以冀傳信也。清人歸愚全集。隨園著述。並有罅卷。錄收壽文壽詩。曾文正全集。且有哀輯榮哀錄之例。然世人皆等常視之。著作之林。未加斥進而已。自入高閣。此何異於徒拾覆瓿。以投爛楮之簞者耶。先生七十壽日。及其捐館舍後。凡遠邇耆宿名達。以至伶賈。皆數千百人。趨集而行祝行弔。祝弔文字。體式自非一格。高下亦自弗齊。然皆各卽所知。各揭其公誠之情。質檢之義。著諸牋帛者也。吾今仍倣昔人取載壽哀文辭之例。而悉變其式。以求體制方雅。於其文字。但取切似明著先生學行。無浮無濫。或有得於一體之微。亦必采掇無遺。未敢過執嚴格。必其文字工善。盡足名世也。其後揭掇聯幃文字。則吾讀春在堂全書。其於楹聯。皆各有輯。以附諸後。蓋非吾之規例。閒有各體文字。非可全取。則摘句以存其指義。著其實錄。藉儲史料。而垂一世之論定。若句語而無可摘。則不得已置之焉。吾固無容心其閒。十七年七月二十日朱義胄識。

陳寶琛壽先生文曰。林君畏廬。以文鳴海內。門下著籍者。數百千人。七十生辰。爭獻詩文爲壽。君頗厭苦之。

獨置酒。集耆年會朋舊相娛樂。是會倡自君。歷八年矣。坐中以壽言屬予。予何能辭。予執友寶竹坡侍郎。君鄉舉座主。直言敢諫。類劉子政。其忘身急友。亦儼然東漢人也。君少以任俠聞。事親至孝。顧善罵人。人以爲狂。竹坡獨契賞之。令二子與爲友。卽伯蒔仲蒔。庚子同殉國難者也。君旣集同年友。刊竹坡遺集。又自爲傳奇。記伯蒔事。且時時存恤其家。予長君四歲。而君丈予以竹坡故也。六試禮部不遇。則授徒奉母。充然自得。喪葬畢。始出就杭州講席。久之。復入都。主講金臺書院。五城學堂。新政始興。兩宮破格求才俊。郭春榆侍郎薦君經濟特科。謝不赴試。君之心。固以祿不逮養爲戚。無亦有見於橫流之亟。非一簣可障。不願冒榮苟祿。故寧以布衣終耶。時君年未六十。予以宣統初元。至都。君猶主五城學堂。兼授大學文科。國變後。始盡棄所事。而以賣文鬻畫自給。君初常遙譯歐西小說。以娛太宜人。旣流播於時。都市爲紙貴。求者沓至。積成百餘種。亦以是食力。洪憲稱制。重其名。啗之以高等顧問。弗就。又以碩學通儒徵。益堅拒之。九謁崇陵。主梁文忠種樹廬。遂定充焉。嘗進所平左傳擷華。上讀而善之。詢君行誼風貌。知其善畫。因恭繪兩箴以進。上親書煙雲供養四字。賜之。並時出內府名畫。俾縱觀。君狂喜。以爲三公不與易。觀君惓惓於在三之義。則向之不應特科。亦非以不仕鳴高矣。予交君逾三十年。見其耽道嗜義。齒彌宿而氣彌厲。神彌固。德業亦彌懋。日必作畫數事。譯書千餘言。以自程。乞文者。信手應之。且以其暇。集徒談藝。而未嘗有倦容。所入旣豐。則親舊之貧乏者資焉。夫人之富於才力。足於性分。皆天之所厚者也。受於天者厚。大之。則其氣足以配義與道。小之一材一藝。亦有以自永。君嘗愍夫世道之陵夷。邪說之競作。而辭以闕之。此其所自任爲何如。則吾人之所祝

於君者。亦唯是保齋神理。節勞養粹。以永干城吾道。而無負竹坡之知也。

三多壽先生序曰。琴南林先生。以文學名當世。其所爲小說。尤衆。凡百五十種。盡外國名筆。清麗纏綿。而論軼事者。駘蕩奇譎。言不可窮。自武夫貴官婦女。以及學校之士。皆愛誦其書。書行天下。稱曰林譯云。先生爲人孝友。性剛直。少好帶劍任俠。以奇節自負。而鄉里莫能知之。多以爲狂。光緒間。以舉人主講金臺書院。於是大臣咸薦其才。召應經濟特科。不就。退處海上。歷游山水名勝。所爲詩詞。豪放自喜。而其畫。尤集宋明諸子之長。瀟灑生動。非尋常畫師所能及。人爭寶之。時余在杭州。嘗與之游。劇談宏論。扼腕抵掌。其可否世事得失治亂之故。剖析毫釐。甚可聽也。厥後海內多故。干戈迭用。先生獨居發憤。一託於文章。教世厲俗。辭益雄放。不可御。既來京師。屢徵終不起。熙熙然擁書授徒講學。門下著錄者嘗千人。其視世俗。屑屑無一動於中。而卓然有以自立。斯真豪傑之士矣。士之自負也大。則其自處也重。捐衆人斯須之欲。而其所有待於後世者。寧小小哉。果以先生之才。出而有爲於時。則趣於此者。亦將有離於彼。孰得孰失。固可知已。抑余嘗念明儒若陶九成。吳子傳。陳晦德之倫。網勢利。務大業。遂以其學傳之四方。垂聲累葉。非其所孕育者深。所甄陶者遠歟。而先生蓋有之矣。今年先生七十。其羣弟子謀爲之壽。余迺書此爲贈。以見壽莫壽於著書行天下。而名傳後世也。

王壽昌壽序曰。壬午之歲。長白寶竹坡侍郎。典鄉試於吾閩。其所取。多英特俊豪之士。畏廬先生其一也。其同榜鄭蘇戡。陳叔伊。以工詩名重當世。高嘯桐守梧。卓芝南守杭。方雨亭宰桐鄉。卓然皆有政聲。而先生則

獨以古文辭得名。先生嘗屢黜於禮部。遂絕意仕進。授徒講學之外。無他營。故得肆其力於文章。而尤以昌黎韓愈氏爲歸。先生之文。淵古而有法度。吾閩自唐歐陽行周爲古文。迄今千餘載中。間雖有名輩之作。然皆非所謂古文者。皆非有類於昌黎氏之文者。逮至近代。朱梅崖氏。高雨農氏。先後相繼起。朱高治韓。皆以古文稱。今先生亦治韓。得與朱高相輝映。以吾閩之廣人之衆。累數百年不得其一。今於百年中。乃得其三。吁。何其盛也。先生與其故友高嘯桐。交最摯。曩時嘯桐講學於省垣九彩園之鑄龍堂。先生月必數至。與嘯桐兄弟方雨亭李佛客卓芝南王又點諸人。爲文字飲。歌呼諧謔。不可一世。方之歐陽永叔尹師魯之在錢文僖幕時。何以異耶。先生啖最豪。辯論雄肆。常屈其座人。里人以其氣特盛。目之爲狂生。後先生常斂其氣。以盤鬱於內。其凝於心志。則發爲文辭。其散於四肢百骸。則牢實堅固。宜其健康而難老。今年五月。尙結侶遊雁蕩。而余則以衰病之身。方喘息於里下。瞻望羨慕。嗟嘆久之。人之才力不相及。有如此者。特於先生覽揆之辰。敘其略而爲之壽。

陳曾則壽序曰。畏廬先生之名。曾則聞之二十餘年矣。光緒丁未。來京師。就五城學堂教習。時先生爲總教。見先生容貌清奇。藹然可親敬。每聞緒論。豁然胸開。又嘗觀先生作畫。淋漓揮灑。興趣絕豪。先生謂曾則曰。家人數口。仰吾十指而食。幸生平無大疾病。天之眷厚吾者至矣。又曰。世間無一物爲我所有。惟父母兄弟妻子。是吾所有。安得不盡心焉。世人多稱先生文章藝學。曾則獨以爲先生性情深厚。實有過於人也。辛亥。曾則南歸。越四年。來京師。訪先生於寓居。先生殷勤垂問。情意甚親。述及朝政之變。及謁崇陵事。因歎歔流

涕不能自止。相對泫然者久之。辛亥以後。一時名公卿大夫。跼蹐入國門。紛紛喪其所守。能全始終者。不過數人而已。而先生以布衣。踰懷故君。繫心本朝。蕭然閉戶。固窮守志。不稍濡忍。以求合於當世。豈非信道甚篤。眞知輕重大丈夫哉。聖人謂天下達道五。君臣也。父子也。夫婦也。兄弟也。朋友之交也。此五者。相恃而俱存。破君臣。則父子夫婦兄弟朋友之倫。無不破。故自王綱解紐。而非孝公妻之怪論。猖狂叫囂。上不敢問。下不敢責。獨先生辭而闢之。豈得已哉。懼人民之失其本性。而胥變爲禽獸已耳。其附和邪說。以先生之言爲迂闊者。若至大亂之極。創鉅痛深。必有思之者。可斷言也。今年九月。先生七十誕辰。先生之弟子。發書徵文辭。曾則雖不能文。思與先生交誼。不敢隱其固陋。因執筆以述景仰之意。且祝先生康強壽世。至於期頤。以扶持世道人心於萬一也。曾則字慎先。湖北蘄水人。清王貢癸卯科舉人。

同門林凱謬序曰。辛酉九月。畏廬先生既七十。諸故舊及門之士。暨嘗知先生者。咸爲文以壽。凱從先生遊。且二十餘年。揚權盛德。義不敢後人。顧文字陋劣。不足稱先生行事。屬辭者累日。顏赧汗集。竟不就。已念古來文字。不必其工而後可傳也。蓋有里諺巷語。傳誦千歲不絕。何者。苟其事磊落軒天地。雖述者之絀於辭。天下固猶從而傳誦之也。今先生盛德。海內瞻仰。吾文雖劣。或猶愈於里諺巷語。又安知其不藉先生以傳也。吾則何憚。先生文章滿天下。所遙譯西國小說。凡二百餘種。又善作畫。得其尺幅者。尺璧兼金。不啻也。人之稱先生者。或曰先生老於畫者也。其知者。則曰先生今文學家也。史遷韓愈之亞也。皆非能知先生者也。先生志行堅卓。性至孝。母夫人病瘍且潰。先生籲天。乞削畢生功名。爲母請。病良已。自是不復應制舉。嘗以

經濟特科徵。不赴。光緒末年。居京師教授。大臣有欲官之者。具疏且上矣。先生走告之曰。疏朝上。吾夕出都。後此勿相見也。乃止。晚遭世變。屏居以著書。講學作畫自遣。當局多欲招致之者。竟不出。戊午庚申間。主太學。方盛倡談辭。士頗爲所惑。先生著論闢之。無稍迴避。士乃感動。向之倡爲異說者。亦稍稍自悔。孔子稱躬行君子。孟子稱聖人之徒。先生其斯之謂乎。世乃以文學稱先生。陋矣。况又儕諸畫家稗官之流。吾嘗謂彼蒼愛人之心。無有窮極。人縱自絕於天。而天卒不忍遽絕之。必委曲以致其惻隱之情。故雖在昏亂之世。而治平之機已伏。萌芽方茁。天必嚙植之。以徐待其盛長。方戰國之世。生民之病極矣。匪獨暴政恣行而已。又且邪說並作。古先聖人之道。不絕如髮。然一時大儒如卜子夏孟子荀卿。天皆縣其壽。以延道統之傳。迄至秦政焚坑。聖學掃地。而申公伏生諸儒。猶以老壽爲世大師。蓋貞元絕續之交。人綱人紀。必有所託寄。而後不至於淪胥。天心之仁愛。茲其見端矣。今世變日亟。政亂學荒。深識遠見之士。輒相與咨嗟太息。謂人欲橫流。罔知所屆。將率天下而反於禽獸。然而老師宿儒。爲世矜式。如先生者。天皆若特引其年。又使其聰明強固。精神弗衰。用克奮其筆而信其舌。以扶翼斯世而反之正。天道人世。固未可知。剝復否泰之機。吾將於先生一身驗之矣。請浮一觴以爲先生壽。且爲世道幸。先生其一笑而許之乎。遂書以壽先生。願先生益爲世自愛也。

先生壽之期先。文學會諸友。咸豫推義。胄爲壽文。先生亦以書抵杭縣。許以栗曰。悟園必以文壽我者。宜道交情。萬萬無溢出尋常外也。義胄謹秉其訓。撰序壽之曰。夫子刪詩書。定禮樂。而作春秋。雖子游子夏莫能

贊一詞。楊子雲閉門草太玄。天下非謂之。而弟子侯芭。謂其書勝周易。子貢曰。夫子之文章。可得而聞也。夫子之言性與天道。不可得而聞也。弟子之於師。不必盡得聞其言行。奚從而贊之詞。苟有所知已。奚可不贊之詞。然則吾於吾之師。而一取道於古人。可乎。吾初之生也。里僻而俗無文。舍塾蚤而飽憂患。天下賢師。無屑吾誨者。年二十。遊京師。取吾先生之書讀之。於是始喜爲文。見者以爲善。吾心未可也。及再入都。錄所存藁。以靳先生之誨。乃大善之。召吾懇語若親故。吾以爲古之人也。而肅弟子禮焉。其後先生會授左氏莊騷。魏漢唐宋文家法。乃親炙其教。吾於先生。宜嘗有聞矣。而未足稱述。凡先生所爲詩古文辭書畫小說。天下莫不久傳誦之。更奚待吾之贊之詞耶。吾今敢以所聞先生之言行。述之天下。易大傳曰。天下一致而百慮。同歸而殊塗。自入民國。先生九哭崇陵。甘爲隱逸。吾頻効忠共和。而幾於死。先生未嘗加非逆。此先生之達也。清光緒間。公卿爭薦先生。皆辭不赴。此先生之潔也。洪憲謀盜國。以碩學通儒徵先生。署表勸進。而誓死拒之。此先生之貞也。事母躬烹。弗乖厥志。先生之孝也。撫友託孤。而教養兼資之。先生之義也。剖其賣文之錢。逾萬。而以振人窮。先生之惠也。夫惠德之澤也。義德之幹也。孝德之本也。貞德之固也。潔德之光也。達德之通也。而先生一身備之。則其以布衣而爲天下師。文章而爲百世法。非皆積德乃然耶。吾授文京師垂十年。每謂古人立言。其慨惻悲懽。非虛聲也。其駿馳濤湧。非客氣也。其霞堆電閃。非浮光也。其清淳而美厚者。非稀味也。由其素昔操心聖賢之道。優游於六藝之圃。博涉載籍。體驗世變。有得於中。而以爲文。則不啻直陳其性情。剖示其肺肝。文之形質。卽其人之映相。故其文爲眞文。後之人。靳至於其道。苟身心而未治。則無

以立文辭之體。情志而未純。必不足發文辭之華。言行不敦。不足崇文辭之品。無狹天下之節。胞與民物之量。不足大文辭之氣。文辭奚不可以見爲人。吾寧故爲高論欺人者。讀先生之文章。而一一求索其言行。吾曷嘗豪髮欺天下。先生使語吾曰。必爲文壽我者。萬萬無溢出尋常外也。吾今之言。其有敢溢出尋常以外者耶。蓋猶先生尋常言行耳。當先生壽之日。天下名賢老宿。撰文詩書畫以祝者。數百千人。無間識不識也。吾才望都未足爲稱述。而豈可竟無侑觴之詞乎。敢爲之歌曰。閩之山。猶岱之色。閩之水。洙泗之澤。日月行於天。永昭先生之德。

女弟子駱樹華壽文曰。歲辛酉秋九月。爲閩侯林琴南先生七十壽辰。先生爲今之學者泰斗。自大學中學以至女學。祁祁然皆奉之爲師。而精於其業。以轉相授受者。亦且不可籍記。而先生之德乃益尊。夫天下有達尊三。得其一已足示人以不可慢。况又有其齒耶。賢士大夫。暨先後門生著錄者。羣謀所以祝之。其文且羅列也。嘉言懿行。舉凡可以致壽者。方且推闡靡遺矣。然則將何以壽先生耶。無已。則謹舉先生之所以造於此校。與諸生之所以獲益於先生者。輒溯往跡。請以質言。藉佐觴罍。可乎。是校之立。初始於荊州將軍祥亨女公子繼識一老女士。以嬰兒子不嫁之身。斥家財興學。雅聞先生名。因彭君翼仲紹介。聘任經學國文教習。訓誨殷殷。有踰骨肉。嗣以校費不足。壁修脯弗受。而課文說經。鏗鏗然益加勤。逮樹華任校事。費益絀。校幾不可歲月支。先生復以筆耕所獲。飲助之。歲以爲常。猶不足。趙无補孫慕韓王晉卿三先生。僦坐是沉吟也。乃做先生之高行。藉先生之盛名。轉告當世賢者。贖金以益之。校事乃稍稍能自振矣。然先生不以此

自慰。而惟以學風爲念。乃者新說颺起。名姝閨彥。多眩雜眞。先生曰。淪啓新知。宜也。而舊道德藩籬。可或畔乎。乃舉羣經誼理。告之示之。鉛之重之。抑若懸肺腑於唇。猶恐不給者。而諸生相染相嚙。亦皆有以融氣習之囂。而悉歸之靜。往歲請願之風。幾遍全國。而此校獨無一人焉。附和者。皆遵先生之教也。以視隨園之教女弟子。斤斤於風雲月露之詞。其相去爲何如哉。蓋嘗讀漢儒林傳矣。當時齊魯諸大儒。世傳經術。生徒或至萬餘人。而輾轉相傳。猶且名其首傳之人曰某氏易。曰某氏書。曰某氏詩與春秋。雖至今數千年。無變也。異日者安知女子中不有邳張先生之教。以行之於世者乎。然則先生之所傳。又曷可量耶。若徒取松柏岡陵諸剿說。壽先生於年齒。抑膚末矣。夫膚末之言。固非先生之所樂聞也。樹華時爲北京畿宜女學校校長。以上錄散體文都七首。

郭曾忻壽先生文。則駢儷體也。其文曰。夫元塗可踏。必協高融之姿。圓覽靡疆。要約聰麗之範。磨須彌之硯。歎智慧於周身。拾陀移之文。獲貞延於永齒。然而玉澤上壽。非蹴可期。慧業禪人。於古難竝。若迺束髮約身。迄於華首。壽考作則。尤有令名。早韞夷吾風颺之性。中該公孺輟軒之學。晚厲楊柯隴山之志。受天爵於薊邱。挺經神於嵒海。蹈榮翼肱者。希其嬰擗夷姤之踪。駕祓龐眉者。進其勸黽敦櫜之贊。如我畏廬先生者。蓋獨恢乎遠矣。歲在辛酉九月。爲先生七十生日。凡里人之留滯京國者。眷幃相屬。而問序於余。維我先生。道高一代。智綜九流。周情孔思。備萃於昌黎。項墨吳筆。衷歸於洪谷。王子雍之占授。輒數萬言。嚴植之之講經。逮九千衆。儒宗之碩。吾何加焉。夫曼延之祝。雖萃於詩。而修禊之詞。非登於雅。將欲鑒耳盛德。側心廣庭。則唯有揚摧元會之交。標置貞慧之際。古云歐九。頗類鄭條。今之伯喈。實逢張纘。蓋以先生之學術行誼。求之

三百年中。竊以爲其志事。類顧亭林。文章。類惜抱。藝能。類石谷。豪俠。類寒支。秋宵多暇。摘發比方。觴史之娛。或有取爾。在昔桓靈垂燬。始挺高密之儒。隋唐嬗興。於得河汾之教。岷山生當叔季。幼有介容。躋躅語濂之涇。特立幾復之外。奇氣燭若。唯交元恭。文心凜然。相勵臥子。及夫延平師弛。靈谷祠荒。東走漁陽。北窮霸國。春則祇登於天壽。秋復展謁於鍾山。烏呼。孽以息悲。駿誰奔而此職。營平流徙。孤成撥亂之書。華陰栖遲。晚共說經之客。先生南州高士。朝右紆以鹿巾。北平賃居。士林歎其蛛隱。屬以璣衡失握。玉步全非。基扃固沍。逾二百年。山岳崩隳。遂一十載。浯溪續頌。魯直亦元祐之黨人。嵩少寄身。遺山補明昌之野史。雖丁邨高節。僅舉孝廉。而髣髴厚恩。不忘故主。每值朱櫻獻熟。白柰歌哀。羅薦杯觴。懷皇陵邑。靈禽栖老。謝翺有九日之詩。鐵馬汗趨。杜甫託幽人之拜。而且四朝聞見。盡入章編。九牧聲名。能憐釣籍。始彌綸乎忠愛。實詮究於廢興。匪唯孤憤。克媿前修。卽論聖安紀事之書。烹廟諒陰之記。微言所繫。異代同符。此則先生志事之類。亭林者也。迺若軻雄表裏。退之有起衰之功。穆柳扶將。永叔有復古之望。自宋以還。隘文囿以限操觚。屏藻塗而崇返樸。古文之名。漸成絕學。畢如一代。曾不數人。桐城之矩。隨於歸方。猶江西之繩約於陳呂也。顧靡言弗華。世猶病其瘁音。旣雅不豔。乃有取夫清汜。惜抱少學芋川。別師薑塢。採縱橫於海峯。極鑒挹於東浦。厭薄餽飭。故規義於翁紀。疾棄縟飾。故致辯於蔣袁。然其爲文也。並舉於陰陽剛柔。不廢於義理考據。故其門下。豪贍於顓軒。溫約於柏枧。瀏拔於劉孟塗。清壯於錢東注。經席所臨。文體俱蔚。先生夙涵學海。晚似靈光。揚葩振藻。司馬導其前鑣。執聖挾經。韓公植其美幹。扶風三歲。著錄孔皇。元嘉四門。文辭並發。於絕續存亡之

世爲雄深雅健之辭。舉首羣儒。潛心大業。敏子雲之室者。窮冥知化。以就其深湛之思。升叔文之堂者。朗麗
哀志。以扇其釀實之跡。質其瑰特。或遠邁於望谿。老而冲醴。足抗行於夢穀。至其門徒之宏逮。講席之篤專。
不出諸城之門。婉辭階平之薦。凡斯數者。畢同昔賢。此又先生文章之類惜抱者也。若夫丹青不老。三祖有
通神之稱。山澤能癯。五嶽呈真形之佩。歷禩畫人。永得壽券。是繇含天和以運思。顰性靈而役道。近代聖手。
無如清暉。蓋其卅歲受湘碧之知。中年得西廬之供。晚而親窺祕府。妙冠選場。疎林古澗。營邱之遺規。修竹
幽亭。吳興之舊本。雲西筆在。則有溪堂詩思之圖。巨然法存。則有泰岱松風之軸。洪鑪點就。合頓漸爲一宗。
鉅鼎扛來。兼趙王之雙美。憚壽平之跋語。宋牧仲之贈言。略無讓詞。退推神作。先生早懷至藝。沉潛八格之
間。老抒天機。滂沛三家之外。惠崇小景。馬遠殘山。別有會心。尤工遠勢。輕裝羈越。黃子久之寫富春。矩轅詣
燕。柯丹邱之圖清閼。其於石谷。目想心存。濡染煙雲。闇連畦畛。乃至纏綿師友。則耕煙之歲奠奉常。其感慨
亂離。則耕煙之生丁鼎革。以及夫東門拂袖。辭升斗之微官。便殿開屏。借縹囊之真蹟。標格訢合。遭際略同。
此又先生藝能之有同於石谷者也。從來孫金盧采。非所論於德器之符。徐劍韓氈。必有待於獨行之侶。忠
經乃徵於板蕩。勁節有見乎疾風。吾鄉背山拊海。義宅勇郭。嘗論勝國之遺民。獨取寒支之一老。其少年也。
放逸豪宕。若駒駘之脫羈。其窮學也。沈深峭刻。若鸛鵒之鳴夜。談兵撞斗。早料興亡。去國上書。匪殫悲憤。黃
石齋之徵辟。報以尺書。劉念臺之成仁。卹其孤女。易堂七子。竝爲息壤之盟。媿菴卅年。自踐首丘之誓。其壯
邁也如此。其諒直也如彼。迺返而觀於先生。則負薪一谷。具武行德之異才。挽弓四張。稟綦連猛之奇勇。偃

而不襍。閭郈式其能仁。敬而有羣。麗澤美其相習。遙呼船屋。便服戴淵。遠贈生芻。有如長倩。懷瘋憂於君國。篤風義於友生。每觀其悱怨之文。鄭僑有崩榛之歎。誦其武俠之記。要離有穿冢之思。趨臺感詠。事擬房州。孤山懷人。義均范式。荒莊話夫白廟。前遊嘆夫黃壇。雖人海之可藏。奈橫流之未已。偶來抵掌。猶見撫膺。以視寒支。矜奇桑海之餘。倨傲蓬蘽之內。雖顯晦不侔。而振奇則一也。夫此四君者。千夫之特。一世之雄。甄絕學之幽遐。蓄玄波之光彩。而先生撻其奇行。奄有羣長。可謂文獻之尾閭。江山之閒氣。抑攷其端居之美意。更復突過於往賢。亭林學際天人。而年裁望七。納小妻於靜樂。撫遊子於江南。積書等身。窮年瑣尾。先生則味道常腴。駐顏若渥。狀霜杰於酈泉。分雲籤於葛井。階前玉樹。盡比謝家。簾外榴花。能娛坡老。已得解圍之新婦。復抱負牀之幼孫。其不可及者。一也。惜抱文章爾雅。而撰貫未宏。乏竹汀之淹張。遜石笥之奧麗。時代所限。不極繁妍。先生則披涉萬卷。若陟蒙山。涵飫百家。能言曲水。凡夫鳥震之異文。雞次之祕典。虞初之舊志。伽盧之新書。天方筠沖之譚。大食拂菻之載。象胥之所未盡。韞人之所不窮。虎僕晨搖。鴉青市貴。書者腕脫。聽者神移。榮說苑之壯觀。貽藝林以瓌作。其不可及者。二也。石谷畫學湛至。而履跡未周。故圓照篋衍。多嶺嶠之奇踪。曠亭毫端。得嶠峨之生氣。挈以相方。美猶有憾。先生則生於海國。有蒲永升畫水之才。客於錢塘。是夏禹王畫山之地。用能枕席泉石。躑躅雲霞。今夏冒燠南征。窮探雁宕。躡康樂之舊屐。臥樂清之仄航。九棋累碧。仰觀靈芝之峯。匹練界青。頰賞錦谿之瀑。鯨帆張幃。燕剪分泉。遊龍之陰森。伏牛之聳拔。芒屨細踏。畫笥全收。卽茲腰腳之耐勞。可信性天之自縉。其不可及者。三也。寒支志潔行芳。而跼伏閭里。夫孔席孟

轍。吾道所以張皇。馬帳董帷。人倫資其講肄。由來魁碩。必接鴻都。先生則屈丹鳳之翔霄。爲祥麟之在藪。動不累高。貞不絕俗。麈尾執處。輒疊疊然。鹿角折時。是經經者。比以媮民罔教。舊學將衰。乃就城南。自立講社。文中牛溪之講易。識者美之。子靜鵝湖之說經。聽者泣下。人絕有繫。理窟所歸。其不可及者。四也。余於先生。攀嵇恨晚。交范爲榮。曩者五都之儒肆方成。兩京之戰塵乍息。私謂汝南許劭。故是偉人。江左夷吾。始見丰采。礪礪多節。仍有中於棟梁。水鏡能呼。庶相稱於冠冕。自慚樊準。曾薦龐參。終歎桃椎。堅辭寶軌。當時固未嘗不識鸞鵠之無意於卑笈。亦未嘗不望梗枏之有支於危廈。及今則鄧林追日。看執手之成翁。絳縣論年。識懸車其已老。金人灞上。共話茂陵。銅駝棘中。坐逢典午。然後咨嗟於先生之迢然高舉。爲能養生而跋大齊也。伏生未耄。榮期尙髫。排轡龍文。摸陳鴻朗。以式鄉榜。以告邦國。笑言啞啞。任嗤九如作頌之愚。風雨瀟瀟。聊當一尊論文之約。以上錄駢體之文一首

陳三立壽先生五言古詩曰。蒙安列至人。又獨稱才士。先生墨者儒。道術在於是。顓顓以盡年。抱古洩文字。袖繹百國書。如醇醺萬類。橫流插壇坫。強聒尊孤寄。餘技包憚王。好手亦樹幟。穿限應求者。得錢活親懿。自詭食其力。嗚然驕一世。今歲試腰脚。投杖窮海澨。雁蕩瀑漱腸。播吟副好事。私怨不過我。顏鬢揣夢寐。自注生神交數十年。未及一見。隔酒倚槁枯。忘老枕中祕。

王樹枏詩曰。燭龍久失曜。神皋沈九幽。冥行而擗塗。歲月忽已遒。念我同心友。七十春與秋。愧吾一日長。皎皎雪滿頭。雲龍日追逐。如水以石投。君也聖人徒。中弼而外彪。堂堂萬夫敵。一身當衆咻。文學尤傑出。航航

夏與游。善刀不屑試。耆古勤且戮。無木可棲鳳。無水可飲牛。萬喙恣淫哇。使我兩耳聒。君乃守玄默。恥爲世所輶。惠施書五車。叢殘快薪樗。出其所緒餘。萬象供鑄鍛。鄭公擅三絕。衆美罔弗收。才大命所憎。結此天人傳。我聞古真人。寢覺無夢憂。老來貴自適。上與造物游。相將爲無涯。巧厯難推求。黃農不再世。期子崑崙丘。董元亮詩曰。昔在越王山。橫舍共磨錯。摩挲鉤龍跡。意氣已騰蹕。竭來五子祠。閩學闕苦卓。淵騫不標榜。沈謝互揚摧。自注。叔眉教如兩師。歲晚梅花叢。浮白閒調謔。壯遊各分飛。老至手重握。頻爲文字飲。再覓遊釣樂。今年政七十。壽眉輕腰脚。兩翁相視笑。肉山照鸞鶴。無爲較癡狂。躋坐且多酌。君才了百輩。儒俠亦相兼。言語妙天下。或比干莫銛。豈云操戈矛。苦心爲鍼砭。雄文逮小說。手稿森牙籤。一水與一石。價重直萬縑。新聲付二八。紅牙玉纖纖。世人競嗟呀。多能頗不廉。抑知方寸地。義利界孔嚴。立身有本末。引年益安恬。寸田尺宅間。嬰蛇闕而潛。歌者侑三爵。久要意無厭。董元亮字季友。福建閩侯人。鄭孝樸詩曰。昔有雁蕩遊。樂山者林叟。鄭虔病樗散。高李真契友。叟方勤六法。絕處摹心手。哦詩復作記。勝筆敵王柳。盛時事塗抹。遭世甘老醜。我今爲叟發宏願。更無餘事祝蒼天。但假腰脚三十年。踏徧浙東山水窟。野人爭看地行仙。

黃春熙詩曰。六橋補柳翁。大名天下耳。爲文爲詩詞。當時輒披靡。小說媿唐人。亦貴洛陽紙。閒情作繪畫。雅擅鄭虔美。所求非其人。千金輒不市。爾我少年時。師門盛桃李。忽忽五十年。寥落晨星比。君亦隔南北。相望匪一紀。多君能却聘。利祿猶泥滓。經師與人師。輦下龍門峙。今年君杖國。作健天寶使。獻詩與稱觥。賓朋多

鉅子。定知春覺齋。有酒如池醺。而我跂燕雲。俚句付雙鯉。寄聲更問君。何當還鄉里。城西小西湖。近亦歎觀止。春秋值佳日。士女紛羅綺。山水亦有靈。急盼君杖履。

夏曾佑詩曰。學行亦何嘗。寧非時與位。至者不必傳。傳者不必至。一藝有偏長。其餘不復記。故書滿床頭。強半無其事。所以讀古書。可誦亦可棄。先生洵健者。衛道無一避。藏山紙千張。乃以小說吹。然以小說言。其功亦已遽。吾民拜泰西。幾以人天比。政治與起居。不敢容思議。先生發其扃。兇醜無不備。國狂庶幾醒。天下受其賜。至者卽不傳。是功亦其次。秋色滿中原。蒼蒼到庭翠。松柏獨後凋。天理固有寄。再拜一稱觴。不盡稱觴

意。曾佑字德卿。
浙江錢塘人。

涂鳳書詩曰。大道日陵夷。斯文孰主宰。舉世何所有。荆棘與甲鎧。二三講學人。乃復矜奇駭。綱紀日淪胥。聖哲非模楷。如醉復如癡。侈口談革改。人禽本幾希。至斯亦危殆。觥觥林夫子。毅然任守待。謂非辭而闢。是則予之罪。起與羣喙爭。再接再厲乃。庶令天下人。知有大義在。如夜方漫漫。朝曦騰渤澥。又如汎濫流。萬派終一匯。少年尙游俠。意氣空朱解。冠蓋游京洛。桀劍驚僚案。翩若雲中鳳。朝陽有異彩。眷念歐陽荻。永懷老萊綵。潔蘭懽可承。繁華辟若浼。三錢市饘飢。忍饑療兒餒。至今述往事。哽咽悲阿嫺。世運苦乘除。國步及辛亥。優孟著衣冠。登場笑傀儡。故山火燎原。安有薇蕨采。大隱隱金門。萬事同敝屣。惟有故國鬼。垂老不能罷。孤臣一掬淚。淒涼冬青澗。今日知舜禹。當年號鼎鼐。豈知大丈夫。行事當磊磊。完此堅貞操。窮餓終无悔。徵聘書盈篋。一笑卻贈賄。半畝春覺堂。纂述敢荒怠。問奇侯芭來。新詩市人買。澶拓與戒臺。勝游扶一拐。譯書羅

西珍藏袖有東海。偶然託丹青。聊以消磊砢。流傳到藝林。寸縑抵百珣。窮年擁皋比。古誼相訓解。自謂時不宜。還希世有豸。平生重尊親。大節可巍嵬。乃知衛道功。不以空文紿。賤子辱交末。忘年長以倍。文醖有餘權。過從不嫌每。斗室噴幽香。黃華初破蕾。值君攬揆辰。爲君祝壽豈。珍重歲寒心。會見春蕩飴。鳳書字子厚。四川雲陽人。劉鼎和之詩。先生嘗稱其別有趣。其詩曰。未識林翁面。曾讀林翁文。獨精古文辭。於今尙罕聞。和聲調鵠舌。嶮然思不羣。嗟予小子小。束髮授典墳。中華言文學。頗聆長者云。今上先生壽。當席請具陳。中國文一字。義約四級分。古道日以遠。本義日以湮。太上起唐虞。二典書尙存。文德敷重華。文思安放勳。是爲第一級。帝王自有真。尼山興於後。斯文在精神。第二爲文治。文與武相鄰。典章法度閒。周代稱彬彬。文已屬形迹。猶尙醇乎醇。第三爲文學。儒家以修身。孔門殿四科。四教列平均。夫子之文章。得聞惟此親。以上數三級。實曰文之原。後者文化絕。劫火嬴秦焚。兩漢迄於今。中國如蒙塵。乃產第四級。厥爲文辭言。盤旋楮墨中。獨占以爲君。班馬至歸胡。文士出如雲。雖則出如雲。久已離本根。雖則離本根。游藝亦多門。詩賦漢著志。騷歌楚發源。駢體美齊梁。詞曲選宋元。尺牘四六舊。時文八股新。韓歐諸家作。古文辭乃尊。能起八代衰。誠獨張一軍。尙比科學例。分類一成純。但攝文辭系。奚啻羅八珍。名家窮皓首。寶如鉛出銀。我見日本國。漢學猶殷勤。我聞英法文。與古賞亦欣。文者言非吹。中有文明因。此心此理同。何分東西民。胡爲浮薄子。橫行徒笑顰。三年識千字。一世空萬倫。競將直語譯。愁見村言繙。文人有體用。文心同秋春。包含真善美。表見智勇仁。意彼學舌人。固未夢闢閭。衆囂翻藝圃。舍己爭他耘。遂令千古事。冤埋同覆盆。此事關國運。此言難俗人。我祝先生壽。

我思祭酒荀。文昌一星明。庶以照昔昏。規矩留幾希。信非爲私恩。何時尊酒閒。從容重細論。

齊耀珊詩曰。縹緲武夷山。仙真舊窟宅。陂陀凡九曲。一曲一震魄。虹橋雲壑閒。中有方瞳客。夜鐙研素書。朝

食養白石。黃冠時往還。洞天手開闢。凡骨久已蛻。仙籍吾能譯。其少年事任俠。一劍形影親。意氣孫賓石。節

義田子春。回念高堂上。上有白髮人。千金不敢殉。六藝時自陳。著論駭流俗。樂道忘賤貧。一賦鳴野鹿。卅年

潛海鱗。游俠不足傳。儒冠終誤身。其二軒皇鑄九鼎。鼎成昇天去。踐烏蝕耀靈。長夜無由曙。羲和尸厥官。有

窮攝天馭。名利熏世人。園綺亦羶附。硜硜魯諸生。掉頭不回顧。激昂蹈海心。悽愴攀髯慕。滄江老布衣。流淚

謁陵句。其三。大道日陵夷。淫辭烈秦火。六籍皆罪言。毛舉無一可。凜然衛道身。奮鬪叢千筈。墨守有堅城。不爲

羣愚墮。時繙法廬書。妙筆如炙輶。我讀亦忘疲。公精不嫌夥。一卷虞初志。橫流振孤柁。其四。登高望四方。秋色

蒼然來。繁花瞬凋悴。華屋俄頃頽。自非造化徒。疇與松喬儕。偉哉春覺翁。七十猶嬰孩。朱顏常美好。玉樹何

蕤蕤。請與汗漫期。遠游周九垓。其五。齊耀珊字照岩。吉林伊通人。

邵章詩曰。世運丁陽九。師儒遘其艱。偉哉崑山叟。南北徒閒關。思陵凡六謁。孤臣涕長潛。活國無良會。崎嶇

草莽間。先生古振奇。奮筆攘凶姦。公車萬言書。赤濯在人寰。一生曜講席。東城杭之闌。著籍盡高第。走也與

躋攀。湖樓寫水石。夢繞交蘆灣。人海復大隱。栖遲城西山。撰杖多雅故。心傷邇自閒。稼堂壽其師。剝盡陽迺

還。先生倦曲志。作易有憂患。觚酒洗鬱抱。儻開霜雪顏。以上錄五言古詩都十篇。

傅增湘壽先生七言古詩曰。有偉一翁稱踐卓。魁壘歲星漢方朔。家風多藝嗣虞齋。郡望高山仰長樂。平生

制行兼夷惠。雙清心跡冰壺濯。文如潑水探驪珠。詩契滄浪喻羚羊。游好丹青老不知。弗嬰朱紫藏以樸。大隱春明四十年。叔度淵懷撓不濁。古來壽世莫毫素。衰叔曹尚趨蕪駁。自尋奇逕出偏師。別闢堅城高截轂。虞初九百嫌陳因。世界三千觀卓犖。置布瀛環供取材。鴻筆龍文獨扛搨。大師曾育五城英。小說竟成一家學。巍然泰斗尊書林。薄海集麟仰淺瀾。等身書已足千秋。游目杖思登五嶽。憶昨別我將南行。九點齊煙欲俯囑。約吾先路資前籌。以我爲導情何慤。我循南幹觀中原。大江左右窮搜搨。中馳河洛北幽燕。甌越名區屢超躡。翁今古稀外史儔。自注。如冠九山。別號古稀外史。腰腳登頓須揚摧。我游樂清極大觀。心目寥亮恣驚爆。十谷八洞三十巖。百二峯嶠猶郢斲。雁湖羅列峙若鼎。龍湫大小張成幄。觀山翁富康樂情。如攜妙句詩須捉。翁聞我言信往還。山容爭露煙開剝。白頭五老齊聽詩。卓筆凌雲風噉晡。靈襟雪浣仍宜南。輭紅十丈塵胥撲。會文講社槐成蔭。娓娓清談勝馬稍。得江山助情益奇。風濤下筆開惛眊。不憂才思盡江淹。豈把彩毫還郭璞。宗風梅鶴自清高。端居爲想含毫邈。少微黃大丙方明。清源誕降殊堪較。亭林玉馱霞客編。廚駕牙籤添整妮。松齡妙墨方見貽。自注。月之二十日。家嚴八十壽辰。翁曾畫松爲祝。還預赤松慶筵渥。我家城北翁城南。相見雖殷恨不數。武夷何日坐看山。笙鶴慢亭馳珪擢。方今居近海王村。百城高擁來鷄鷺。看弈長安幾爛柯。仙境蓬萊俄一覺。服膺柯古增諸臯。閱世幻情費雕琢。祝翁毫輪同不磨。始信人閒有錢偈。周樹模詩曰。我讀謝山書。心折蜃園與天多。儒生溝壑眞細事。志行磊砢終不磨。古來遺逸半龍性。浩蕩不與鷗同波。嶠南一老儒中俠。古心如結腸無他。前身疑是黃漳浦。定力早退摩登魔。自注。有本事。白日肝膽伏一

劍。南窮八閩北至河。風漢詎免人指目。名字早躋孝廉科。樸學鴻文動海內。便從京雒營行窩。戶外弟子屢常滿。門雀豈侶翟公羅。閩學祇今有別派。文章正始詩元和。語音尙是秦博士。塗抹可笑舊阿婆。化人閱世等沙數。日車傾側天爲頗。龍髯邈絕鼇足斷。移山無力驅本娥。子身將壓猶惴慄。百年未盡且婆娑。累謁攢宮如顧怪。屢辭徵辟似之它。帶中萬曆錢。一日何止三摩挲。市頭高士畫。易米時用塞驢馱。此皆孤行有奇意。氣與岱嶽爭嵯峨。如君風節我所敬。何止文字供切磋。虞初九百等遊戲。寶書傳譯言無訛。卽論三絕亦餘事。別有心史藏巖阿。偶然得君一快論。能洗時流百娵娵。霜筋雪骨今罕比。天與歲寒留貞柯。君爲我飲我當歌。董龍雞狗知誰何。籬菊可采詩可哦。盡醉豈惜衰顏酡。永光寺前尋古德。自注。君寓永光寺街。饒舌庶免吾師呵。

王允哲詩曰。竹筴素節生已堅。松柏耆造神純全。在物旣爾人亦然。偃風零秋何足言。卓哉貞世畏廬叟。志事早日凌雲天。承平家巷記談笑。興廢輒刺山陰船。李自注。舍高自注。鑄方自注。魏自注。迭賓主。人物景氣常清妍。此日信樂足畢景。警眼乃類秋林煙。君行人溍旋遊燕。隨身德義高瑱瑤。文筆畫史將詩禪。古今得一堪引年。君擅三事還旁兼。傳薪桃李尤翩翩。向來忠愛出天性。九度柳雪趨陵園。亭林若見定驚歎。千秋名業知難專。嗟我周旋久隨肩。偶然去國還家邊。昨聞雁宕親行纏。道阻欲往空憂悵。寄詩一溯平生歡。停雲直望思此賢。西山蒼翠猶眼前。高秋作健當賓筵。酬白爲我髯頻軒。

毓廉詩曰。南臺山高摩碧穹。石磴萬仞雲濛濛。焚香雨夜登絕頂。祖母疾愈神明通。崇陵西去二百里。遙瞻

華表馳青驄。歲暮冒雪謁先帝。孤臣汲水澆陵松。先生大孝兼大忠。天賜大壽齊華嵩。著書山林隱不仕。文星光射南天紅。先生詩格學放翁。神清骨瘦梅凌冬。先生文體追韓公。辭源倒峽波洶洶。先生書法臨李邕。墨花透紙霜毫豐。先生畫意摹惠崇。豁山烘染分澹濃。詩文神奇書畫絕。藝苑獨步誰爭雄。雞林聲價重拱壁。鬻錢糴米周寒窮。君學淵深才磊落。經史萬卷羅心胸。門牆桃李三千士。如山仰岱江朝宗。京國神交二十載。一朝易水欣相逢。憤談國事雙眦裂。酒酣擊碎琉璃鍾。連牀夜宿葵霜開。月光入戶吟寒蟲。詰朝陵祭坐待旦。衣冠敬聽天明鐘。鼎湖龍去遺弓劍。攀髯未許軒轅從。登山偕隱采薇食。首陽孤竹追芳蹤。行年七十遊興發。名山攬勝來浙東。遠涉鯤溟破巨浪。狂遊雁蕩登奇峯。大龍湫下觀瀑布。懸巖萬丈垂長虹。雙劍壁立插雲漢。五丁斧鑿驚神工。海上歸來大歡喜。畫稿滿簾詩盈筒。菊秋九月君初度。門楣重慶懸弧弓。華堂宴客列盛饌。庖師竈下烹肥熊。舉酒頌君千萬歲。三多吉語宣華封。靈椿垂蔭丹桂茂。芝蘭獻瑞生庭中。延年豈必鉅金玉。煙雲供養顏如童。前身定是西方佛。壽與天地同始終。我皇聖學天亶聰。福祚萬祀方盛隆。黎民戴德懷黃農。會看九五占飛龍。虞淵日出光照空。四海重覩唐虞風。君年古稀非癡叟。我年知命誠愚庸。小臣戀恩犬馬同。殿前奔走圖報功。年年萬壽同祝嘏。我皇受賀乾清宮。

李哲明詩曰。少微一星占處士。文字嫵媚動朝市。萬人都講稱大師。餘技稗官蒐外紀。平生傲岸不俛眉。壯年節行樹根柢。崇朝桑田變海水。鶴歸城郭依然是。子雲不作美新文。客星肯爲興漢起。八家俎豆尊韓歐。百幅雲藍揖蘇米。硯石筆花足自潤。平睨萬乘如脫蹤。聚散數數致千金。未至粟囊臣朔比。我聞日下雲開

名籍籍。十五年前早欽企。吾友太邱嘗爲言。

自注：謂陳仁先兄。

四海君勿失鑿齒。陽城去國。

自注：謂趙芷蓀同年。

共嘉餞。識面

記從龍樹寺。疏慵風欵久未親。懷刺漫滅真愧耳。爾來周南等留滯。殘生傭食例文史。危時分合理姓名。氣

誼或當免嗤鄙。翁今七十薪火傳。乞言徧走洛陽紙。祝翁不朽在萬世。大耋期頤亦彈指。更祝混沌終一啓。

九洲和同無垢滓。太平老氓扶杖埃。閩山蒼蒼水清泚。松菊歸來自此始。

李哲明字星樵。湖北漢陽人。

黃福詩曰。鰲峯龍臺倚霄碧。峽江倒涌海濤激。吐納沆瀣壯東南。文星耿耿耀奎壁。畏廬老人居其閒。嗜古

貪饕恣陵轢。手奏鈞天舞霓裳。口吐紫電翔霜戟。拂拭蕭貫衍波箋。欲和盧仝歌月蝕。有時雷車喚阿香。龍

賓池凹飛霹靂。騷壇牛耳掌敦槃。騰躍百家量玉尺。行年七十老鑿輪。執經三千多通籍。脫帽長揖王侯門。

投綸遠釣龍伯國。高懷肩齊嚴子陵。

自注：謂又陵總長。

閩學淵源今尙熾。六經兩漢有薪傳。派別流衍爭庶嫡。子淵

講德開駢儷。子雲法言僅貌襲。東京陵夷逮六朝。淫哇綺詞工組織。迺邇平沙起岡巒。韓歐踵興稱文伯。河

出重源有正流。曲港支渠歸洪澤。清季鉅子推湘鄉。泛植星宿通潮汐。萬彙各以天籟鳴。蒲牢猶待長鯨擊。

銅琶鐵板本同根。洪鑪陶鑄非人力。邇來怪誕爛紅霞。鐘鏞毀棄鳴瓦甓。周圭孔鼎競傾摧。蝦蟆喫月蠅玷

壁。蚩尤噴霧祝南鍼。昏夜辨方觀北極。老人胸羅照藥珠。撾鼓井陘張赤幟。苦心衛道作干城。廣舌說法霏

瓊液。吾甥小歐。

自注：伯濟。

拜門墻。寄君高文出京國。我老埋聲江漢津。遠道聞名如面覲。海內爭獻東坡壽。何止

庭軒珠履客。飛觴遙祝老人星。皇華俚音愧巴夔。他年武夷談道宅。約尋丹竈煮白石。

黃福字翼生。湖北沔陽人。

沈觀冕詩曰。十年世變等陵谷。一老孤標似秋菊。軟紅塵土十丈高。鍵戶著書宣南曲。煙雲供養天語渥。

自注。

師曾邀御書煙雲供養之賜。

時取江山收尺幅。嶽奇自寫平生胸。能事何當受迫促。前年貺我鹿床本。鉛槧絆人意滋蹙。注。自

師賜畫題詩。有鉛槧絆人亦可傷句。

中州曾築野史亭。南宋更輯遺民錄。義熙甲子義皇人。天遣冰霜眷耆宿。今年七十鬢髮皤。

聞道精神益健復。浮沈鄉國舊門生。北斗京華在心目。憶從大學侍春風。道義文章時我勗。是時世論賤六

經。周亂已從殖落卜。變本加厲繫何人。公獨陳詞挽頽俗。昌黎原道信起衰。孟軻好辯豈所欲。千鈞一髮絕

續閒。仁者之言爲世福。名山一席自千秋。安用瑣瑣數更僕。願同秦晁附蘇門。介壽題石廁卷軸。以上錄七言古詩都七篇

郭曾忻壽以五言律詩曰。閩士爲名拙。前修數鉅儒。翠庭深理窟。左海富經鄒。孰造歸方室。相從穆柳徒。當

今林古度。著論過潛夫。其十度崇陵謁。先朝老孝廉。昔嘗聞顧怪。君獨契梁髯。不恤羣兒笑。何曾寸祿霑。貞

松有本性。要在歲寒覘。其特科羅俊父。世已遠康熙。豈足汙元子。空能說項斯。枉詩猶齒及。衡道許心知。閱

盡荃茅化。江湖一老遺。三畫簾邀宸賞。春條寶御書。緬懷高士傳。自署野人廬。幾輩穿門限。他年重石渠。通

衢紛列戟。數過已爲墟。四言訪龍湫勝。新年尙出遊。戶塵輕萬里。述作已千秋。問字客有酒。浮家虹月舟。撲

爻占疊上。自足傲王侯。五耆年修社約。次第古稀臻。霜鬢渾如昨。鄉情久益親。劫餘桑海錄。世外葛天民。引

滿休辭醉。籬花正及辰。六

趙炳麟詩曰。閩海懷鴻範。儒林一代英。文章輝錦繡。品望邁瓊瑛。早負冲霄志。聊爲仗劍行。論交肝膽在。吐

氣牛斗橫。自注。余友高嘯桐進京考御史。館先生家。余因嘯桐。始論交焉。其一。野舊常供饌。牽蘿自補楹。青燈披史冊。紅粉愛詩名。萊舞衣添綵。

姜魚手作羹。雲天敦古誼。月旦付君平。其二仙窟曾攀桂。詞壇共識荆。蒲輪欣譽重。絳帳面風清。楊億懸徐穉。

書傳薦禰衡。懶修諸貴札。不羨五侯鯖。其三。狐鼠神京踞。龍蛇漢祚傾。食薇孤竹潔。草檄阿瞞驚。自注：洪憲帝制發，余在桂參贊起兵，先生亦在京抗辭反對。

連際玄黃劫。局殘黑白爭。冬青遺老淚。叢菊故園情。其四。野乘窮探祕。霜毫妙寫生。新歡聯洛社。

舊夢覓春明。藏得芸編富。頒來御墨榮。恰逢觴正壽。攜句頌長庚。其五。

王人文詩曰：賢榜開壬午。公今竟古稀。同科人幾在。論世事全非。嚮畫長安市。行歌老布衣。王城容大隱。高

臥感知希。其一。日下聲名滿。巍巍一畏廬。滄桑懷古抱。松菊賦閑居。才筆稱三絕。朋觴頌九如。兒孫能繼起。別

屋有琴書。其二。○王人文字采臣，貴州人。

陳毓華詩曰：孤忠在天壤。兀兀號畸人。嗜酒陶元亮。明經井大春。百金方偶試。萬卷計非貧。氍毹風流極。爭

來識鳳麟。陳毓華字仲恂，湖南桂陽人。

胡祥麟詩曰：畫師多壽相。况復意閑閑。志事亭林外。行文青主閒。白雲起天末。紅葉滿秋山。忽忽春明夢。繁

霜點鬢斑。其一。黃冠游日下。掌故熟當時。耆舊今爭寶。風期我所師。其人良足數。此意豈難知。籬下黃花滿。將

爲進百卮。其二。○胡祥麟詳林氏弟子表。以上錄五言律詩，都十六首。

宋小濂五言排律詩曰：我識君差晚。知君謬謂深。每談當世事。同抱古人心。一代師儒表。千秋著作林。門墻

羅俊傑。經史蘊深湛。志節雲天薄。神明屋漏臨。平生執素履。早歲謝華簪。游藝工詩畫。高懷託水岑。家駒多

逸足。老鳳有清音。鶴壽不知紀。兕觥聊代斟。百言遙寄祝。含笑撚髭吟。以上錄五言排律一首。

樊增祥七言律詩曰：仙果連年結老枝。金錢隨手散孤嫠。叢編百種法英美。彩筆三長書畫詩。習次煙雲常

活潑。酒邊風月儘酣嬉。門墻桃李多房魏。一老河汾壽可知。

嚴復詩曰。左海畸人林畏廬。早年補柳徧西湖。數莖白髮看沈陸。無限青山入畫圖。自有高文媲漢始。更摻重譯續虞初。饒他短後成齊俗。佩玉居然利走趨。

宋伯魯詩曰。虞齋三蠶溯清芬。一榻宣南遠世紛。不傍倪王成獨造。自注。先生畫不倚門戶。而兼有南却排楊墨

發高文。自注。先生啓迪後進。皆助以正學。距誠放淫。不遺餘力。尊前冉冉燕臺月。襟上飄飄雁蕩雲。自注。先生今夏曾游雁蕩諸勝。登覽殆遍。我亦故山猿鶴侶。

自慙腰脚不如君。自注。余少先生二歲。而蒲柳先衰。去先生遠甚。○宋伯魯字芝田。陝西醴泉人。

柯劭忞詩曰。素衣寧浣帝京塵。人海茫茫著此身。三絕舊稱唐博士。一編今續宋遺民。文章流別推耆耄。陵谷遷移剩隱淪。試采淵明籬下菊。不妨漉酒用頭巾。

馬其昶詩曰。青史于今位逸民。先生抱道獨全真。小齋自非烟雲供。老圃無憂芋栗貧。天爲孤臣留甲子。人傳祕錄授庚申。葢山學社崐山集。忠孝文章照七閩。

姚永樸詩曰。閩山遙接皖山蒼。儒澤千秋溯紫陽。此學已成廣陵散。於公得見魯靈光。夙欽彩筆珠琳重。况有傳家蘭桂芳。羣士躋堂欣老健。黃花開處引杯長。

王式通詩曰。澗上名高畫益珍。茂之家法是遺民。當階草色縈書帶。瀉地文心喻水銀。庭樹栽成皆愛日。嶺梅香近恰先春。寓言河漢真無極。著作何嘗限等身。

李兆珍詩曰。方今萬物不由庚。世道陵夷隻手擎。天地使君留正氣。弟兄與我締真情。丹青畫本猶餘事。元

白詩名未足爭。早有文章驚海內。欣逢杖國祝長生。

張元奇詩曰。彌天壇坫幟高張。滄海橫流兩鬢霜。絳帳一時稱極盛。鼎湖自拜未能忘。救時文字猶師古。任俠心情不礙狂。洛社耆英原有例。年年菊酒醉千觴。

郭則澐詩曰。孝廉風義衆爭欽。大隱金門閱陸沈。餘事千秋歸藝苑。正宗一代重儒林。文章已富藏山業。陵闕長懸捧土心。著籍河汾多弟子。瓣香喜祝歲星臨。郭則澐字嘯麓。曾斫之子。

邵瑞彭詩曰。孤根百尺挺青松。道術文章世所宗。晚節豈曾讓元亮。高矜真欲媲常樞。蟠胸書味春能駐。揮手煙嵐老未慵。正及延年花滿徑。願言載酒一相從。邵瑞彭字次公。浙江瑞安人。

王葆心詩曰。先生風義高千古。餘事文章式萬人。百國寶書皆入梓。兼金潤筆盡資貧。謝翱汐社雙行淚。顧絳思陵九謁身。獨有迴瀾心不死。閉門辛苦闢荆榛。其北來兩度見宗工。煖語真如續挾躬。小技一言矜舌

慧。大年千載屬文雄。精靈河洛耆英在。鑿括輪輿左海中。斯道寄公公不老。願陪洒掃逝從公。其二

孫雄詩曰。君爲血性眞男子。風骨棱棱七尺身。道邁韓歐張濟溺。畫追文董善傳神。一齋春覺凝言在。九拜崇陵大義申。口沫手胝畏廬集。望溪而後有斯人。其官柳臨河照眼青。當年太學共談經。高文繡虎師羣彥

名論然犀燭百靈。福地書藏三萬卷。大椿算衍八千齡。感秋賦句都傳誦。孤時湯園自勒名。其二

何振岱詩曰。天風颯然動齋壁。坐讀畏廬新著書。霜菊照人重九後。古心游我典謨初。琳瑯遠寄從京國。語笑親承記里居。昔別艾年今七十。曾聞彊健艾年如。其摩天巨刃此鴻文。宣髮依然纂述勤。咳唾散爲萬珠

玉。心胸養有古煙雲。韓公復古存原道。蘇子填詞總愛君。老隱王城閱桑海。觚棱可戀是斜曛。其一一齋晚歲方游嶽。濟勝還傳李畏吾。遙與鄉賢修故事。卽令雁宕有新圖。更添化境年來畫。默映寒湫白後鬚。異代冬青陵樹感。芙蓉驛句尙留無。其三世邪神理却堪憑。抱道耆儒足壽徵。轅固常爲東閣憚。伏生尤有惠公稱。請看此叟蒼松立。行見斯文曉日昇。說與人閒原伯魯。莠言易泯不須滕。其四

成多祿詩曰。小住城南爲近天。一廬風雨感年年。愛才檢點論文社。宴客經營賣畫錢。萬事淡於雲過眼。半生貧到雪盈顛。短衣匹馬皆堪憶。射虎歸來抱甕眠。其一笑傲書城與酒尊。人生七十幾朝昏。劍光難掩封侯骨。鏡影常懷戀主恩。誰信異書埋井底。我慚高士畫松根。自注。去年爲繪松根高士圖。并記以詩。年來共抱游山興。春覺齋中夜

款門。其二文中門下半公侯。賸水殘山對白頭。櫪驥更存千里志。疲驥獨拜二陵秋。交情真契螺江老。自注。謂陳太保。

蹤跡爭跨雁宕游。飽閱興亡成一笑。何須滄海歎橫流。其三南北方輿不限人。自注。公嘗言吾人若在唐宋時。斷無相見之理。相師相友亦前因。每看嶺海渾無隔。始信文章倍有神。禾黍故宮垂老夢。江湖秋水遠游身。八千春色三千路。莊鳥吟

成祝大椿。其四

林福熙詩曰。滄桑時局屢推遷。我友依然澹定天。隱退閒雲無宦味。宏敷化雨廣師傳。菊籬松徑眞彭澤。畫筆詩筒老輞川。更羨佳兒能用世。臨民政績衆稱賢。

楊懿年詩曰。早枕經籍臥西湖。老寄京塵號畏廬。融會百家諸子筆。譯成八索九丘書。井眉鐵匣心藏史。畫閣雲林叟字迂。教授河汾儒者事。眼看房杜挽天樞。楊懿年字里未詳。

林步隨詩曰。文章今日要扶輪。信覺吾髯最軼倫。左海論才高子羽。孝陵上食媿寧人。等身著述殊忘老。餘事丹青並有神。黃菊已花杯在手。秋光瀉入酒波鄰。

林步隨字季武。福建閩侯人。

熊昭漢詩曰。歸然碩望重南天。壽考神明杖國年。接武孤山真處士。殫心環業軼時賢。萬金鴻寶珍同覩。千幘龍眠妙許傳。遙睇商顏久欽挹。期公康祉百川綿。

熊昭漢字輯蓀。湖北天門人。

羅惇蟲詩曰。南豐文筆玉田詞。強被人呼老畫師。餘事每成幽怪錄。十年幾作謁陵詩。雲山佳處狂濡墨。絲竹閒情笑撚髭。獨有螺江陳太保。似公歲歲又生兒。

林振先詩曰。稗海雄談騁九洲。江山勝概筆能收。時窮姑作王城隱。花好能支晚節秋。遺老亭林容有託。吾家古度許同儔。西清祕本嘗探得。樂興時還訪橘洲。

林振先字梅南。福建閩侯人。

劉冠雄詩曰。眞率頻年接坐氈。小窺未盡管中天。陶頑相約尊高密。愈病爭思展輞川。唾肩脩成篇九百。酬縑何止字三千。金門依隱容遊戲。歲歲來過度索筵。

梅光遠詩曰。涵茹六籍老彌專。文采風流海內傳。都講競宗閩洛學。明夷猶筮義熙年。累徵不赴高徐檄。三絕蜚聲繼鄭虔。鳳舉鴻軒軼塵表。羽觴飛醉菊花天。

梅光遠字斐漪。江西南昌人。

莊蘊寬詩曰。讀畏廬書三十年。初從小說繼文編。丹青不問老將至。陵谷何嘗世與遷。插菊滿頭爭傲節。采薇在手抗時賢。是翁矍鑠由天賦。嘉話還同梅鶴傳。

狄葆賢詩曰。華髮盈顛述舊聞。德音抑抑老彌勤。縱橫傳記循韓柳。頤養雲山類沈文。已見河汾傳絕學。還

將歌詠答斜曛。秋風叢菊年年健。持祝頻張酒國軍。

葉恭綽詩曰。化行北學如時雨。人擬東方是歲星。酬酒謁陵成獨往。著書充棟各流馨。平生志業兼儒俠。藝

事傳誇亦典型。揚觶祝公同橘叟。明年報國更添丁。葉恭綽字譽虎。廣東番禺人。

陳保棠詩曰。用晦自稱老畫師。丹青娛晚不知疲。攘襟能息啁啾語。傾篋頻伸儲佩眉。溝瘠介夫曾有夢。鼎

湖炎武得無悲。挽瀾人海身猶健。長是煙雲供養宜。陳保棠字伯南。福建長樂人。

周馥詩曰。譯筆爭傳海外奇。盛名赫赫重當時。記曾卻聘標高節。還有閒情賦小詩。野鶴飛來絃應指。菊花

香到酒盈卮。聖朝經學多耆壽。耄耋康寧好預期。其一。侯官名哲推嚴叟。惟有先生與頡頏。妙筆寫真同史漢。

法言傳世雜諧莊。衣冠已是貞元輩。才傑都居弟子行。笑看及門多愛戴。玉泉齊晉萬年觴。其二。周馥字玉山。安徽秋浦人。

著有周熙慎公全集。

唐肯詩曰。先生當代列仙儒。笠履蕭閒入畫圖。戀闕依然留洛下。著書不恤做虞初。傅山落筆元精耿。鄭露

攜琴古調孤。一樣巢居洗塵俗。漫勞梅鶴擬西湖。唐肯字企林。江蘇武進人。

薛肇基詩曰。兵燹餘生慶古稀。青山無恙市朝非。閉門昭法畫名重。許國寒支心事違。文苑他年憑位置。稗

官一例寓褒譏。自注。先生譯歐美小說數百種。古文宗史漢。而歸櫛桐城。宮廷似識煙雲意。四字親題寵布衣。自注。先生名勳。宮闈。御書煙雲供養四字賜之。○其一。自

是君恩海樣深。不關摹擬顧亭林。十年京國鷄鶩恨。自注。改革後閩無寧歲。先生居都門。爲避地也。九度崇陵犬馬心。自注。引先生謁陵詩。捫心賴有綱常。

熱。先生能無犬馬戀二句。石隱可憐猶戀闕。陸沈誰謂到如今。義熙甲子題詩卷。未覺蹉跎鬢雪侵。其二。門前十丈輓紅塵。

中有幽人道韻真。不瀨時流作名士。自云故國一頑民。

自注：先生常謂但願人呼予作學究，不願呼我名士。

夢中田里蒼霞遠。

自注：閩中蒼霞洲，先生有精舍在焉。

囊裏風光雁蕩新。

當路錯疑彭澤傲。

自注：項城在位時，由先生門下士某道意以高。位請先生曰：吾願可得，人不可得也。某懇而止。

入山已是廿年身。

先生光緒季年即不欲仕。○其三。

平生最愛說梧州。一代南雷信寡儔。

自注：謂高太守嘯桐。

海內幾人託同調。

自注：先生與高最契，每謂予曰：吾之知君，蓋以嘯桐。

尊前此老足千秋。河汾講學門何盛。韋孟傳經願易酬。

自注：先生諸子皆通才。長君令劇邑，次爲祕書。

我喜頻頻過蔣徑。素心猶許附

羊裘。其四。○薛鑑基字淑周，福建人。

陳懋鼎詩曰：舊時俠骨老風塵。聖譯紛綸與世新。君國獨存摩詰畫。煙霞長護許由鄰。相從泰岱尊吾道。數

謁山陵健此身。眼底黃花成一笑。自將縫掖領門人。

林灝深詩曰：障海迴瀾事可期。吾宗矍鑠見須眉。過江有幾真名士。被酒還稱老畫師。誰識杜陵最忠愛。大

難坡老合時宜。扶衰祇在綱常做。多事羣兒撼樹爲。

林灝深字朗溪，福建閩侯人。

李汝謙詩曰：曾聞賈誼叨前席。

自注：清帝迭頒宸翰，且時時溫諭垂詢。

喜共彭宣拜後堂。

自注：初謁先生，因高足弟子昌邑陳明侯介紹。

老去不因強飯健。

閒來聊爲著書忙。孤忠賸比葵傾日。

自注：先生不忘故國，時謁清室陵寢。

勁節還同菊傲霜。

自注：某公欲贈千金，爲先生講學之助，辭之。

講道河汾自

尊貴。卻容房杜假餘光。

自注：門下如徐又舜，皆藉先生爲重。○李汝謙字一山，山東人。

謝哲勳詩曰：超然遺世一完人。老榜京華尙舊臣。且喜吾廬長嘯傲。不知世路有荆榛。文章海內猶傾倒。車

馬門前半隱淪。我亦儒冠狂習在。年年杖履獨相親。

謝哲勳字金波，福建閩侯人。

李宜龔詩曰：龍潭孟氏浩然堂。爲有雄書道益尊。不出自成千載計。坐談能述百家言。請看籍湜行將叛。始

信荆凡可并存。最是一篇齊物旨。味腴堪作養生論。其一。自注。是時先生憤世疾俗。不遺餘力。故用五六兩語以擴其意。胸中邱壑畫中收。健筆真堪挽萬牛。不用避人編甲子。要令知我有春秋。移家預結看山侶。勗子遠爲種秫謀。料得觚稜長在眼。白頭欲去總淹留。其二。

黃濬詩曰。東街老屋舊同居。總角吾栽矚著書。豈意汗流儕籍湜。仍聞大隱傲嚴徐。九州生氣留椽筆。五嶽真形在珮琚。欲借龍章侔雋烈。種花人本義熙餘。黃濬詳林氏弟子表。

林桐實詩曰。老隱王城意自寬。早知氣味不宜官。孤山遺愛公能道。自注。公爲先子寫孤山補梅圖。並作記。先世交情此最難。文稿平生同性命。畫錢垂念及孤寒。壽杯高舉重陽後。白髮黃花共耐看。林桐實詳林氏弟子表。

楊式琛詩曰。煙雲供養有高樓。耆舊當推第一流。曠代文章如日月。入門桃李半公侯。孤忠不爲元姦屈。交誼曾無宿諾留。敢以瓣香祝遐壽。名山著述自千秋。楊式琛詳林氏弟子表。

陳建詩曰。七十看山千里行。花閒扶路集門生。傳人鴻雪增名勝。日下風騷主正聲。畫稿雨餘論米芾。草堂秋澹過侯嬴。煙雲供養永難老。菊觴壽翁到底清。陳建字及里居未詳。以上錄七言律詩。都五十有二首。

康有爲以七言絕句壽先生曰。說海於今聽似雷。濃熏班馬有高才。願公頤壽成千卷。公尙嬰兒猶未孩。林頤詩曰。先生久冷出山心。讀畫論文愜素襟。一事堪爲詩老壽。六橋補柳已成陰。林頤字里未詳。以上錄七言絕句二首。

李權調寄念奴嬌詞曰。聞名廿載。祇天涯落拓。愧投魚雁。桃李陰陰經手植。兒輩幸依門館。自注。光緒年間。先生主講五城。兒子濟。從子湘。均受業門下。濟原名順井。湘原名順升。將樂南歸。德安北至。風氣資移轉。休論餘子。羣言早自淆亂。不見舉世滔滔。狂瀾

欲倒。黑白紛難辨。一縷斯文欣未墜。默默知邀天眷。松秀危峯。菊馨晚圃。幾度經磨鍊。孤芳自賞。任他桑海

更換。李權字翼孚。湖北鍾祥人。著有鍾祥縣藝文志金石志。以上錄詞一首。

徐世昌則壽以聯。其文曰。仁者樂春。以茂其德。詩心參曉。別有高懷。又曰。畫家臨山水。松石之格。詩人識鳥

獸草木之名。此二聯。均署水竹邨人。○按徐世昌出任大總統後。自號水竹邨人。

趙爾巽聯文曰。壽身壽世。經師人師。

朱益藩聯文曰。文學縱橫。公眞健者。煙雲供養。帝有恩言。

陳衍聯文曰。講席推名輩。畫家定大年。

王樹枏聯文曰。魯國一儒。歸然大老。鄭虔三絕。今之古人。

王式通聯文曰。石谷林樹稱畫聖。圭年山水記昌平。

郭曾忻聯文曰。光景何新鮮。文工畫妙各臻極。儒庠恣游息。隱居行義於其中。

李兆珍聯文曰。正古稀年永當益壽。問天下士孰與齊名。

江瀚聯文曰。平生獨以文字樂。此老眞成矍鑠翁。

徐鼎霖聯文曰。應是畫師吳道子。誰識神仙張志和。

寶熙聯文曰。行歌畦上。期頤樂。偕隱雲中。十德賢。寶熙字瑞臣。滿洲人。

耆齡聯文曰。歷劫畫師文彥可。謁陵遺叟顧亭林。耆齡。滿洲人。

秦樹聲聯文曰。山陵要腳霜紅畫。湖海須眉水繪詩。

三多聯文曰。舉人賣畫。徐埃齋不慙遺老。隱士著書。傅喬廬合享大年。

曹經沅聯文曰。橋陵風雨新詩本。輞川雲煙老畫師。曹經沅字懷衡。四川綿竹人。

虞熙正聯文曰。文高玉局隨書局。壽益逋仙作地仙。虞熙正字伯嚴。福建閩侯人。

吳敬修聯文曰。封禪無書真處士。誦觚餘事老山傭。敬修字鞠農。河南固始人。

林開馨聯文曰。景曦陵寢談遺事。古度煙雲養大年。林開馨字詒書。福建長樂人。

袁勵準聯文曰。畫家遺老推昭法。詩社耆年仰茂之。

張元奇聯文曰。百歲幾經多難日。九州爭識有名。

曹秉章聯文曰。鄭虔雅致時無兩。伏勝經師老更尊。曹秉章字理齋。里居未詳。

李經畬聯文曰。餘事舊文富逸譯。畫家多壽卜期頤。

卓孝復聯文曰。天許煙雲供白髮。晚饒光景有黃花。

董元亮聯文曰。三絕鄭廣文。曾拜采雲邀御藻。前身陶彭澤。恰宜生日壽黃花。

力鈞聯文曰。餘事畫師雄一世。名山大業壽千秋。

張勳聯文曰。撫香山圖。續虞初志。稱無量壽。樂有涯生。張勳字少軒。江西奉新人。

孫雄聯文曰。耆壽同符王石谷。鄉賢接武李檀河。

高向瀛聯文曰。大年高處士。不仕是佳人。

王劭廉聯文曰。成百二寶書。通國歡迎新譯本。領三千秀士。躋堂同祝老經師。王邵廉字少泉。直隸天津人。

翁敬棠聯文曰。劇孟心腸。程嬰風誼。昌黎嫡派。摩詰前身。翁敬棠字劍秋。福建閩侯人。

余榮昌聯文曰。晚節菊松爲伴侶。家風梅鶴是神仙。余榮昌字戟門。浙江紹興人。

奎濂聯文曰。看耆英會洛社圖。九老須眉。大文更推才學識。是顧亭林王山史一流人物。餘事兼精書畫詩。

奎濂滿洲人。

林福熙聯文曰。文中子道重人師。多士歡欣純嘏頌。潘河陽政孚民望。好官源本義方來。

趙椿年集蘇東坡詩句曰。無數雲山供點筆。祝君眉壽侶增川。趙椿年字劍秋。江蘇陽湖人。

王存聯文曰。師說韓昌黎。小詞韋端己。畫禪董思白。高節顧寧人。王存。江蘇江都人。

黃培松聯文曰。能孝節母。天報以壽。共宗文豪。人讀其書。黃培松字菊三。福建閩侯人。

陳望雲聯文曰。北地菊香留晚節。西湖柳色醉詩翁。陳望雲。福建人。

吳廷燮聯文曰。南國賀虞人。推耆德。西京蓋寶。天錫大年。廷燮字向之。江蘇陽湖人。

莊蘊寬聯文曰。古稀匪廬壽。歲寒自有心。

丁震聯文曰。方胡駢散歸洪冶。文董丹青竝大年。丁震字超五。福建閩侯人。

吳閩生聯文曰。氣蓋三軍。文高千古。名齊八俊。澤被九州。

沈成鵠聯文曰。前身應是陶彭澤。後學重呼韓退之。沈成鵠。福建閩侯人。

陳學裘聯文曰。左海文章大家數。蓬瀛甲子古稀年。陳學裘字叔治。福建閩侯人。

陳彥訓聯文曰。歲月婆娑娛晚趣。煙雲供養仰宸題。陳彥訓。福建人。

黃毓清黃毓湘聯文曰。說禮敦詩爲世所仰。存心養性是壽之基。毓清字仲康。毓湘字季康。江西清江人。

林志鈞林志烜林志琇聯文曰。是倪雲林徐埃齋一流人。今古滄桑都入畫。唯周荀況魯伏勝百餘歲。後先

齒德定同符。志烜。志琇。並志鈞弟。

楊炳樞聯文曰。晚節有花剛九月。古稀一老尙前朝。楊炳樞字里未詳。

王世澂聯文曰。韓子斯文若元氣。鄭公垂老稱畫師。王世澂字峨蓀。福建閩侯人。

黃翼雲聯文曰。與造化者遊。西廬老人宜上壽。系山斗之望。南雷文學真吾師。黃翼雲見林氏弟子表。

楊良聯文曰。山菴湖光上希高躅。經腴史液以養遐齡。

李濂鑑聯文曰。畫骨自隨人老健。古懷不與世消礪。李濂鑑見林氏弟子表。

孟琇棠聯文曰。東方先生善諧謔。學語小兒知姓名。孟琇棠見林氏弟子表。

李郁聯文曰。一集義熙存甲子。兩齋安定有生徒。李郁見林氏弟子表。

張厚載聯文曰。文扶八代唐韓愈。業有千秋漢伏生。

陳懋解聯文曰。潔身夙遂乘桴志。壽世爭傳出袖文。陳懋解見林氏弟子表。

李建聯文曰。經師人師。躬承閩學諸儒統。詩史畫史。手寫香山九老圖。李建見林氏弟子表。

趙從原趙從京聯文曰。先生詞筆江山助。漁父桃源歲月深。趙從原從京見林氏弟子表。以上錄聯文都五十八首。

林彥京壽先生序。有繫先生出處學術之文。如嘗講學於浙。從遊者多所成就。二語可與陳寶琛撰序。喪葬既畢。始出就杭州講席之言。相參證。

又晚游京師。適學校興。聞先生名。爭以禮聘。由是久居教習。故事在學校稱職。且歷歲月久者。得被舉獎官。

當道者尤時時屬意先生。皆謝絕焉。民國成立。先生益甘肥遯。舊日請業之士。躋通顯者。赫然甚衆。先生

淡泊如初。不以此自多。先生耽於典籍。老而彌篤。著述既富。尤善爲文。采古昔以來之作。無不精析源流。

洞矚利病。及其自爲。妙義奇解。風發泉涌。不依傍宗派。而一歸雅正。每譯書。與精於西國文字者相嚮坐。

彼持卷。先生持筆。口說而耳聽。意會而筆隨。食許。可成數百言。視原書之意。不爽寸黍。而文采覓絕。他譯者

莫能及。先生譯書之名。幾於婦孺皆知。按此諸語。皆足發明本事。○林彥京見林氏弟子表。

吳德祖所撰壽序。自謂清光緒庚寅。其尊人知廣東嘉應州事。隨侍受讀。卽欽朱晦菴蔡聞之皆閩人。又二

十年。始知繼朱蔡芳躅者。爲琴南夫子。本年正月奉文爲贊。遙執弟子禮。夫子以未謀面而稱弟子。深斥

其非。而誨我諄諄。則已著之門生籍矣。刻苦爲文。拳拳於綱常名教。又不願人廬目之爲文苑中人。按此諸語。

願能道先生學問志事。○吳德祖見林氏弟子表。

吳國鐸自謂年裁十三。其壽序有曰。當家君千里馳書。願埒門牆之時。曾疑其非。家君乃歷舉唐時林簡言

竇秀才之欲求埒韓文公門牆事見告。且謂畏廬先生。今之孟軻揚雄韓愈也。交臂失之。將爲後人所惜。國

鐸見林氏
弟子表

曾鴻昌之壽序曰。先生爲人。好文章。重節操。不汲汲於富貴。不戚戚於貧賤。先生深於莊叟之學。其教余也。亦時以南華經講說。謂莊叟至人也。文奇道幻。無出其右者。故先生之不慕榮利。薄視富貴。不爲外物所誘。而自處於逍遙之域。深得莊叟遊心於淡。合氣於漠之指。義賢嘗聞諸先生曰。吾學旁涉老莊。而終其身所宗主者。孔孟程朱之說也。則異乎曾君之所聞。蓋夫子之教人。亦

多術矣。○曾鴻昌
詳林氏弟子表

蔡運升壽文曰。從先生講韓文左傳莊子漢書。時先生年六十有八。執贄者百餘人。雖當盛暑。猶口講指畫。循循然不少倦。一日講韓公羅池廟碑。於當時士大夫之賢否。及歷代君子小人之辨。慨乎言之。始知先生之學。一本於道。先生之文。爲載道之文。蔡運升詳林氏弟子表

廖道傳序曰。光緒壬寅癸卯閒。京師大學肇建。道傳幸得躋躋遊。是時長沙張尙書總學事。而吳公摯甫。于公晦若。張公小圃。李公家駒。暨中外知名學者。分職司成教育之任。人才學風。蔚然興盛。其後遂得公任倫理講席。公之學。以孝友忠信爲本。其學說。則兼綜漢宋。旁通東西。不隘不濫。一以自得爲歸。而尤以文章雄天下。故其教授倫理。於道器一貫。文行交修之旨。三致意焉。公之譯著。雕鏤異域人物情況。宜若與中土夔絕者。而文皆雅馴之詞。義歸情理之正。俾吾國讀者。擷奇攬勝。足以藥己短而益己長。亦漸適乎吾國民之情性而已。故言文化於今日。公所著書。猶中道也。廖道傳詳林氏弟子表

一時名伶如梅蘭芳。尙小雲。皆以續事爲先生壽。而程艷秋。則續朱衣達摩叅定之象。自題其上曰。爾時世

曾放眉開光其光金色。徧照十方無量世界。還住佛頂。化爲金臺。如須彌十方諸佛。淨妙國土。皆於中見。

陳望雲詩有句曰。內行純篤本至性。祝母天壇夜半起。三步一跪五步連。匍匐長涂如尺咫。自言賣畫治

生計。連城價重洛陽紙。論交不棄貧賤友。推解還爲曹邱子。囊中賸有潤筆資。寄振故園託雙鯉。自注。謂昔

閩江大災。先生寄百金助賑。

翁鳴瑀詩有曰。縱未託孤能許友。不惟釋怨更全人。按其自注。謂先生於人有弗嫌。若甚嫉其人。有急難。仍必赴之。此先生所不自覺。故自壽詩未之及云。○翁鳴瑀福建閩侯人。清光緒

癸巳舉人。

江天鐸詩有句曰。大隱金門不歸去。看他潮漲又潮平。又收拾遺聞歸一派。又東南幽恨滿詩箋。又爲儒爲

仙無滓塵。又論詩論畫復論禪。不要公卿寄俸錢。此數言。皆能切似先生節守。○江天鐸字競齋。廣東花縣人。

黃大琮詩句曰。能排邪說標文幟。不受污塵傲布衣。晚節但栽彭澤菊。獨清自食首陽薇。大琮字梅修。福建人。清光緒戊子舉人。官

知縣。

林天禧詩句。文字遠承秦漢脈。歲時獨署義熙年。林天禧見林氏弟子表。

唐宗郭詩句曰。黃菊九秋翁七十。奉觴弟子近三千。又揮斥金錢喜推解。又高懷合比陶元亮。薄倖羞同杜

牧之。又海外奇文費重譯。城中名士仰清塵。唐宗郭詳林氏弟子表。

胡鄂公詩句。春明萬人海。靈光尊是翁。圖畫並編什。所得良已豐。按其自注。則謂先生嘗畫南湖舊隱圖爲撰記。又續漢陽歸棹圖兼作詩。而以錫之也。

陳煥章四言歌有曰。有清之季。道喪文敝。誰其振之。林放之裔。道宗孔聖。文本六藝。三畏存心。其虛名畏。又

洪水橫流。大教將墜。國學無人。邪言爲害。廢孔滅倫。如狂如醉。公獨正之。移書責備。一紙風行。義明於世。

陳煥

章字重遠。廣東高要人。

薛錫珍聯文有句曰。峻德和光。

昭名隱行。薛錫珍字里未詳。

蔣希召蔣季哲聯文有句曰。少陵詩。摩詰畫。吏部文章。兼擅其長。是爲古稀。

蔣希召字叔南。希哲字某。浙江縉寧人。希召著有雁蕩山志。未刊。

○以上錄詩文語句。都十有六條。

貞文先生學行記卷二

林畏廬先生學行譜記四種之二

潛江朱義胄述編

壽哀之文。必崇實黜妄。若非中蘊誠意。素篤摯情。自然流洩於翰楮。則辭況斷不易工。非文樸而義檢。則立言必無可信。至於浮藻濫諛。餽釘數塞。千篇雷同。觀者益厭之矣。昔人總集。於投贈文字。雖有取錄。而挾摭必嚴必精。罔稍假借。豈唯祛妄汰濫。亦以冀傳信也。清人歸愚全集。隨園著述。並有嬗卷。錄收壽文壽詩。曾文正全集。且有哀輯榮哀錄之例。然世人皆等常視之。著作之林。未加斥迸而已。自入高閣。此何異於徒拾覆瓿。以投爛楮之簏者耶。先生七十壽日。及其捐館舍後。凡遠邇耆宿名達。以至伶賈。皆數千百人。趨集而行祝行弔。祝弔文字。體式自非一格。高下亦自弗齊。然皆各卽所知。各揭其公誠之情。質檢之義。著諸牋帛者也。吾今仍倣昔人取載壽哀文辭之例。而悉變其式。以求體制方雅。於其文字。但取切似明著先生學行。無浮無濫。或有得於一體之微。亦必采掇無遺。未敢過執嚴格。必其文字工善。盡足名世也。其後揭掇聯幃文字。則吾讀春在堂全書。其於楹聯。皆各有輯。以附諸後。蓋非吾之規例。閒有各體文字。非可全取。則摘句以存其指義。著其實錄。藉儲史料。而垂一世之論定。若句語而無可摘。則不得已置之焉。吾固無容心其閒。十七年七月二十日朱義胄識。

陳寶琛壽先生文曰。林君畏廬。以文鳴海內。門下著籍者。數百千人。七十生辰。爭獻詩文爲壽。君頗厭苦之。

義胄祭文曰。中華民國十有三年十月二十二日。門人朱義胄。謹衣深衣。免冠經帶。奉清酌時饌之饌。稽首頓首。哭祭於吾師閩侯林先生之靈曰。於呼。生而有死。孰遁厥常。名德矧在。百祀孔章。達矣夫子。肉骸遺忘。耄匪大齊。固一彭殤。吾所慟者。斯文欲喪。存曰在愚。任重寧當。明命皇皇。終世以將。維吾弱冠。載識氏名。鑑衡說稗。服誦獨傾。函丈靡接。希光流熒。越紀丁虎。避地上京。祈品輯文。蒙題而驚。歎鳳祥麟。屣倒相迎。交授縞紵。風義淵渟。爲語宿貧。容概英英。吾未肯俛。平視韓柳。謂我狂簡。餅謹其口。偶說檀弓。遂屈吾首。飲醇醪。醪。北面虛受。己未講習。親炙導誘。踰月弗十。錄語栝縮。夫子賦之。云亡舛駿。楚聞閩語。奚灼若燭。情親日懋。傳鉢思篤。每侍畫績。不暨于學。雪立酸股。夫子嶽嶽。闕謁閒旬。同研來告。夫子寢閉。問暨東郊。驅車赴視。雨滂風襲。吾覲滋憂。夫子陶陶。丁寧慰我。勿以忉忉。敢曰寶松。嘗餌損要。日惟奔省。十里非迢。兩月瘡復。壬戌初秋。劬勞勸節。夫子諾休。著書誨人。藝以優遊。堅豈金石。積瘁鑿錄。盡性內外。況必誠周。曩余病疵。百日裋。裋。慰必無死。數齋以賙。誰飲則絕。信無妄求。知弟惟師。恩深孰儔。今春飢驅。吾歸武昌。謂不欲行。生離與愴。寓書一貺。疾入膏肓。兆啓險動。竟害庸醫。昌陽亟薦。羸困莫摭。幾危卻診。迺決易之。暈絕而蘇。命子遺辭。託梓之策。我疑北馳。趨視榻側。畫掌彌時。曰幾弗見。吾懷懷其病容。慈穆猶咨邦危。撫肌聽息。累日罔異。家人與禱。幸其必治。忽轉於險。丹藥罔施。於呼慟哉。春夢師逝。碩健自負。援言鄉老。卒介上壽。魂夢依依。以譬白甫。今果弗祥。歷月未久。於呼慟哉。人生百稔。幻如黃梁。夫子誠達。吾悲其倉。知心永訣。三年心喪。於呼慟哉。秋空天高。明靈何方。百越多難。九衢弗康。神或有知。式格羞漿。哀哉尙饗。

以上錄祭文都二首。

陳衍哭先生五言古詩四十韻曰。人事如轉燭。交君五十年。長我才四齡。奄忽竟我先。君去長已矣。我心鬱
煩冤。論文常訾我。自昔荷斷斷。反以報君施。寸意徒拳拳。君始學駢儷。記醜紛編爛。既而聘論議。忼慨經世
編。既而五七言。擊鉢鏗騷壇。後皆舍之去。專攻散體文。久之乃自命。梓湖柏枧閒。祕鑰於昌黎。闕抑不使宣。
我進以樸學。君謂道已分。我更以哲學。君謂非道原。桐城有師法。吞吐出半山。七王三歐陽。儵然一丘樊。清
氣在乾坤。本來得之難。往往偶得之。根柢薄且單。晚清衆喙鳴。古籍窮研鑽。文人工相輕。詆諆遂極端。君言
王元美。晚祭歸震川。鉅子雖庸妄。終推繼歐韓。一篇思子亭。悲來嘔心肝。緒餘荏以弱。弇州未知言。猥褻至
寒花。義法豈所聞。嗟君勇原作堅自信。畢生敵精神。益以稗官流。競原作共詫域外觀。媿室諸弟昆。好君夙世緣。
脫稿印千本。不脛走市廛。六法撫四王。柯羅版具陳。三絕真廣文通靈。原作續幾桓玄。不官而不稼。歲入數千
緡。如何廬室廬。區區酬辛勤。此外持左券。羌無原作未聞十萬纏。頭銜宋既庭。自嘲一原作甘儒酸。猶復效顧怪。梁
髯髯共攀。男兒女子子。小者六七人。尙費布與錢。未畢嫁與婚。中有好紙筆。枚臬最象賢。感此罷歎息。大招
告精魂。它時老梅崖。喜得高澍然。載石遺詩續集卷二。○初稿與異者。悉注本句下。

宋小濂挽詩曰。久聞畏廬名。未識畏廬面。甲寅來京華。爾我方得見。握手共恨晚。相親兩情見。故知遇他鄉。
似有前世券。從此訂心交。過從時繾綣。初在文字閒。擊節互賞歎。繼則進道義。差過恆規勸。已乃契心情。理
怡與冰渙。以此誼彌篤。天真隨爛熳。吾鄉三傑士。成徐吾亦算。君皆結納之。往往見辭翰。良會必見招。家庖
具精膳。同坐半耆英。康彊皆善飯。君本蓄道德。文章尤精悍。餘事畫書詩。同時三絕擅。名滿天地閒。委巷甘

貧賤。卻懷忠愛誠。草莽故君戀。九次謁崇陵。衝寒不覺倦。峻嶒骨力堅。日日起清旦。災疹不能侵。靈臺常自煥。誰意今夏來。眼瞼肉微顫。小疾亦尋常。何關心腹患。庸醫藥誤投。鬱久乃生變。引病入膏肓。和緩力難轉。日前我往探。神明尚未亂。豈信遽彌留。一朝魂已斷。生平事可書。國史合列傳。文苑與儒林。忠義亦何遜。庶幾示將來。以爲世道捍。君應慰九原。我仍抱餘恨。一老胡不遺。晨夕觀摩便。憶昔當炎天。年年贈畫扇。晚學立馬圖。寫照運神腕。壽序及園記。亦皆勞筆硯。刊入文集中。留與世人看。附驥名益彰。余生復何羨。有時一展觀。撫卷爲悽惋。噫嘻噫哀哉。潛然淚如綫。

夏敬觀挽詩曰。閩士嚴與林。等以著述老。林書極談諧。嚴書太玄草。嚴死林更蛻。天喪連城寶。豈似尋常人。歿去跡如掃。我聞林翁病。來去一瓶鳥。去去還復來。倚枕書了了。書言六七兒。日午飯當飽。循牆幸不壓。脫身跳如蚤。爾時中陰身。突起示之兆。莊周逍遙遊。生豈校彭夭。哭周非知周。周病焉用禱。寓言八九耳。不死乃至道。世稱志夷堅。見翁一鱗爪。敬觀字劍丞。一字映广。江西新建人。清光緒甲午舉人。官至江蘇提學使。入民國。官浙江教育廳長。

陳聲暨挽詩曰。我性本嫉俗。有聲寄之詩。詩成常請益。丈爲動須眉。張目畢怒罵。解頤事諧談。聖人有微言。炳若三辰垂。創爲白話辭。燭火爭光輝。螺贏負螟蠕。繆種方孳滋。衛道百夫防。廓如關以詞。我口所欲言。丈皆殫述之。氣盛言自宜。享年卜期頤。畫師自古壽。煙雲養天倪。精華尤葆蓄。省察常克治。本是無病人。藥物焉用茲。參苓生壅塞。肢體道憊疲。進言急疏導。若藥此其時。病中強作畫。云以分諸兒。絕筆焦山圖。梁髯寄懷思。署爲後死友。墨瀋尙淋漓。豈知三日隔。禁方乏上池。臨終猶一面。形容驚支離。古文不滅亡。呼兒示諸

斯。彼哉胡蔡輩。蜉蝣空爾爲。

劉肅和挽詩曰。去年壽公詩。尙製裝潢紙。今年挽公詞。丈帛買不起。念公復念世。言又何能已。祇合書寸箋。虔奉焚玉几。長者知古儀。不以貨財禮。

義甯於先生既歿之年除日。往南郊龍泉寺。京北奠先生厝櫬。詩曰。一年斯日盡。辭歲舊禮俗。往者常趨拜。登

堂盛鼎餼。今年及此日。師乃辟百穀。棄我百十日。呼扳冥耳目。荒郊寺寂冷。足音慰空谷。師乎知也未。展拜申恭肅。戶啓白幔垂。不敢燕帛燭。心喪何時已。疑師猶在屋。屢躓繞古木。言去弗舉足。死別亦人常。獨使結中曲。嗚咽淚不墮。酸慟塞胸腹。以上錄五言古詩都六首

卓孝復挽詩曰。惘惘出門去。煙蕪入望平。西風今日泪。落葉故人情。未畢生前願。終償海內名。交期泉路盡。

一念一回驚。其壽吾何所達。所幸及篇文。自注。余生日在八月。先於三月殯。君作序文壽余。語極真切。時君尙未病也。數見翻無語。沈思每有君。卅年

多可否。一瞑謝紛紜。嗟彼哀鳴雁。猶如悵失羣。其二

郭則澧挽詩曰。王城三十載。賃廡戀觚稜。寒日攀龍馭。自注。丈嘗十謁崇陵。孤雲謝鶴徵。晚修天所假。潛德古無稱。舊

價慙題品。因君轉自矜。自注。丈贈詩有文章有價聯三後之句。○其一補柳風流在。傷哉失此翁。畫名追礪上。洒淚並江東。自注。謂有

子百城表。自注。公子宰職輔。有惠政。論文一代雄。講帷來大鳥。落木動悲風。其二起鳳才無忝。傷麟世既衰。英靈千古歸。貞

介九重知。自注。丈嘗得御書貞不絕俗之褒。烽火秦川淚。荃蓀楚澤辭。殘燈詩背讀。迸恨入秋悲。其三猶憶春燈宴。華堂夜未央。

煙雲閒供養。風月小平章。此事嗟誰屬。餘生黯自傷。城南游禊地。駐馬幾迴腸。其四。○以上錄五言律詩。都六首。

三多挽詩曰。窮藏人海著虞初。恆念西湖說與余。自注。壬寅夏。君爲余畫扇。跋語。有每見都尉。恆念西湖也。山水價超驢背畫。煙霞疾謝鶴

頭書。梁廬賦樹身俱老。自注。君嘗居梁文忠種樹廬。有詩。林社尋梅景已疏。多少胸中不平事。崇陵屢哭可能除。

或多祿挽詩曰。奇畫新書徧九州。清名亮節自千秋。何來地棘天荆恨。惹起宮禾闕黍愁。垂死不忘游俠傳。

他生合作守陵侯。去年病榻君規我。黃葉西風正滿樓。其雷劍衝霄鬱不飛。一生奇怪顧兼歸。壯心未已年

偏暮。吾舌猶存道豈非。大烏當前尊伯起。仙禽憤世化丁威。編年竟負先生約。三復遺文淚滿衣。其

王君秀挽詩曰。身後尊榮禮亦宜。布衣姓字九重知。他年有傳歸文苑。並世無人號畫師。門下倘循私謚例。

篋中猶賸謁陵詩。哭翁不盡滄桑感。今日長安尙弈棋。王君秀字及里居未詳。以上錄七言律詩。都四首。

孫雄挽詩曰。去年叔節委埃塵。林叟今秋作古人。留得殘編同不朽。慎宜軒集畏廬文。其九謁崇陵宿殿旁。

惟將忠孝答穹蒼。可憐守戶多飢色。拜罷揮毫黯自傷。其二宰相門前未上書。一篇原道衆邪祛。自注。郭匏庵宮保亥既集。有讀

畏廬致某君札云。退之八代扶衰手。歷卷終推原道篇。廢經禍釀唐藩鎮。自注。君集中與唐蔚芝書曰。胡羅曾左彭李諸公。手握兵柄。分據要日月江

河論絮如。其三貞非絕俗荷天褒。跪逆絲綸喜欲號。三復鈍翁御書記。文如駿馬下蘭皋。自注。君平汪堯峯御書閣

下坂。直瀟胸臆。君集御書記云。臣紆一介寒儒。不列仕版。乃荷御書。良不絕俗四字。頒賜臣家。跪迎門次。哭至失聲。似較堯峯爲榮。史閣先成第一圖。自注。君於戊申秋間。爲余作詩史閣第一圖。傳神阿

堵勝倪迂。撫松更用屢瓢法。自注。已酉四月。用黃履瓢法。爲余寫撫孤松而盤桓小幅。謾謾清風隱者徒。其五不劇歷劫是文章。李杜韓歐許

頡頏。鉅手起衰今賸幾。南推陳自注。駿馬通伯。北柯鳳孫。王自注。晉卿。

又曰。畏廬溘逝。余既作七絕六首哭之。殊覺意有未盡。因於枕上追憶往事。復成四首。畏廬以譯著小說。名

重海內外。余此四詩所紀述，均近小說家言。然悉係實事。不敢欺我死友也。詩曰：行文悽惋善言情。萬本流傳譯筆精。奇絕蒼霞洲畔事。拒人千里冷紅生。其一喂鷹飼虎豈人師。妙論匡生足解頤。廿載學風千丈落。當

年夢得有微詞。自注：君爲京師文科大學教習時，總監督劉幼雲同年。每謂君待學生過於優寬，不意爲時未及廿年，學校之風尚瞬息千變，向之病於寬柔者，今日病其過於嚴峻矣。○其二：虞庠都講共橫經。

日齒肥甘爲汗青。自笑耄期勤舐犢。呼牛諧笑憶忘形。自注：君大學授課畢後，每至監督室休憩片時，娓娓縱譚，又自授課過於勞神，因以滋養品爲酬報，不意天下事有用力於此，而收效於彼者，五十以後，連舉數雄，皆牛乳牛肉汁之力也。余謔之曰：如君言，恐諸公子皆其碩武如牛矣。君曰：凡人必有野蠻之體魄，而後有文明之精神。君即呼我爲牛，我亦應之。○其三：

案側惟餘書十種。自注：君自言少時博覽羣書，五十以後，案頭但有詩禮二疏左傳史記南華及漢書韓歐之文，此外則說文廣雅，無他書矣。見高夢日所爲畏廬三集序。又注：君七十以後，嘗召集冷攤書賈，將所存書籍，賤價售去，余

延往訪，君笑曰：此等書籍，無論兒輩不能讀，亦無所用，不如及吾身而售之，免得身後售於打劫者流，論價十不得一也。其曠達如此。篋中尚有畫千端。自注：聞君有遺畫數巨，諸郎莫使

輕持贈。無限江山坐臥看。其四

陳保棠挽詩曰：旅食京華三十年。布衣名動九重天。謁陵時屑攀髯涕。炎武傷心豈偶然。其一輞川畫趣本兼

詩。窮日丹青老不知。涉筆俳諧眞面目。還他顧怪與歸奇。其二飾生諛死亦游嬉。三百虞初等視之。不與時人

共生活。洛陽紙貴孰瑕疵。其三宜南過我問流民。圖是先生夢裏人。尺一功寧輸馬蹄。千金濱海許分津。其四談

邊感舊觸幽悲。十笏分金畀卹嫠。義取無傷能義與。劉父強擢亦何嗤。其五及此花黃蟹正肥。追陪例憶羽觴

飛。秋風一夕成商調。淒絕占星隕少微。其六

女弟子楊令蕓有詩曰：至性文章光日月。高山景行溯韶年。自注：音未列門牆時，讀畏廬文集李女耐兒傳及冰雪因緣諸書，其至性感人處，每爲泣下不自禁。百回

空立程門雪。自注：蕓謁師每不得見，春間呈師有句云：春風不許吹桃李，踏雪空教立百回。臍有心喪向墓田。其一泰山稊米供游戲。自注：蕓製頤和園模型，師書收簡云：汝真稊米

邱山極紅塵之游戲。

義恕吟箋索校讎。重檢殘翰感知遇。吉光片羽更難求。其應悔移家上苑西。重來壇坫隔雲泥。自

弟自六月間。移居頤和園。從此與師永訣。

霜風落葉秋山道。絕壁何從覓舊題。自注。去年秋。師筆語弟云。予至西山秘覽崖。山僧告予。有女學生束髮長裾。以鉛筆錄予題壁舊句。予知必爾也。○其三。

守陵遺老啼飢色。

自注。見師九調崇陵記事。頭白監官泣黍離。自注。弟頤和園宮詞中。有幾人菜色語前朝。師曰。此其得吾心。一樣淒涼悲勝國。語成請益

失吾師。

自注。近製宮詞百絕。成。而師逝世。未及呈政也。○其四。古今上下幾人同。萬卷遺編一代宗。誰更鐵肩担道義。哭師正爲哭文風。

其五。○按楊令弟詩注。多先生言。宜全存之。○楊令弟詳林氏弟子表。○以上所錄七言絕句。都二十一首。

徐世昌挽詞曰。畫必題詩多寓意。老爲都講是傳人。

陳寶琛挽詞曰。由俠入儒。晚節獨能師顧絳。因文見道。諸家原不廢虞初。

周樹模挽詞曰。流涕讀櫝宮之文。孰是丹心如願怪。拈毫爲泊園作記。惟將墨跡寶倪迂。

郭曾炘挽詞曰。林社屢補梅。懸知驂鶴歸真。故鄉無此湖山好。梁髯久宿草。爲想拜鵲垂涕。世人但賞瓊瑤辭。

姚華挽詞曰。善教有遺思。歷七十載精勤。弟子應聞身歎鳳。成書好歸去。比五千言玄眇。文章及見道猶龍。

姚華字茫父。貴州貴筑人。工書能畫。善詞詩駢體文。

朱益藩挽詩曰。詩畫動楓宸。藝苑祇今重昭法。歲時攜麥飯。橋山不復見亭林。

左紹佐挽詞曰。力挽狂瀾。闢邪說。放淫辭。原道文章韓吏部。心存故國。發幽情。攄蓄念。謁陵跡近顧崑山。

萬繩栻挽詞曰。溺志事稗官。非列非莊。在著作林中。獨標一幟。傷心逢莠世。不夷不惠。於隱逸傳內。僅見斯

人。萬繩栻字公雨。江西南昌人。

黃侃挽詞曰。小說與文章關鍵相通。著書滿家。博雅直過洪野處。匹夫以天下興亡爲責。謁陵九次。忠貞可肖顧亭林。

沈宗畸挽詞曰。醴泉飲鳳凰。折心賴有綱常熱。白日接魍魎。愛國寧寬地下憂。

自注。集畏廬詩句。○沈宗畸字太侔。文字孝耕。廣東番禺人。著有

晨風閣叢書。

王式通挽詞曰。齒宿意新。不以瑣言軼荒渺。風微人往。姑從縣解說逍遙。

趙爾巽挽詞曰。大文維世道。在野有孤臣。

卓孝復挽詞曰。鄭譯潤筆。李邕鬻文。銷磨幾許臣精。直到蓋棺纔放手。廣野非狂。安國少戇。閱歷半生世故。老來閉戶轉平情。

李兆珍挽詞曰。既以學著。復以畫名。兼擅所長。人世重。惟其性同。故其情洽。自今以後。我形單。

何振岱挽詞曰。匝地秋聲。魂魄終依陵樹碧。叅天石色。畫圖晚及雁山青。

郭則澐挽詞曰。入社早從陶靖節。謁陵晚見顧亭林。

吳士鑑挽詞曰。獨抱精誠悲望帝。卽論藻翰許傳人。

吳士鑑字綱齋。浙江杭縣人。

林灝深林步隨林器瞻挽詞曰。鶴馭何之。剩有才名追左海。龍髯未遠。料應魂魄戀西陵。

林器瞻字貢瑚。福建閩侯人。

唐肯挽詞曰。來往菊花天。平生不負陶三徑。聲名圖畫史。身後猶留顧一廚。

溫肅挽詞曰。助後一錢林古度。身前三絕鄭臺州。

力鈞挽詞曰。忠孝性成。顧亭林謁陵痛哭。傳青主却聘嘯歌。軒冕等泥塗。國史合增高士傳。聰明天賦。朱梅崖古文名家。王麓臺畫筆神品。煙霞足供養。天公厚待讀書人。

董元亮挽詞曰。安貧守分。際末流固已難能。崇節義。植綱常。浩氣亙長空。共信斯人原不死。善畫工文。在先生猶屬餘事。關邪說。扶正學。狂瀾回既倒。庶幾吾道賴重光。

成多祿挽詞曰。北斗黯星辰。天也何心奪吾老友。西陵哭風雨。魂兮未遠。痛爾孤臣。

徐鼎霖挽詞曰。俠氣無前。平生風義兼師友。大文不死。萬古雲霄一羽毛。

宋小濂挽詞曰。十載訂心交。始聲聞。繼風義。終性情。比年來晨夕言歡。皓首相期崇令德。千秋傳盛業。蓄道德。能文章。工詩畫。今日者人琴俱往。黃泉何處閱元音。

翁鳴瑋挽詞曰。有分作遺民。看年來著述劫後丹青。半是山河殘局淚。每見無莊語。憶談鬼龍潭。尋僧獨石。不勝風雨故人情。

周貞亮挽詞曰。綜生平絕藝可傳。豈徒大節追梁叟。論當代古文不滅。合有佳兒繼異之。

周貞亮字子幹。一字退舟。湖北漢陽人。

著有書目舉要一卷。自錄學一卷。文選學二卷。

秦樹聲挽詞曰。三絕斷縑招楚些。五噫孤緒撼虞初。

王樹枏挽詞曰。傷哉知己。倏爲古人。一夢竟成長夜恨。藏之名山。以待後世。千年原有不亡存。

寶熙挽詞曰。畫筆譯材。遊戲三昧。瑰意琦行。嘆徹九泉。

周登皞挽詞曰。奇氣發文章。副本名山。平日早懷千古在。暮齡餘涕淚。瓣香寒合。明年卻少一人來。周登皞字熙民。編

建長樂人。

羅朝漢挽詞曰。著作等身高。自有文章傳後世。交情重知己。那堪風雨哭斯人。

黃懋謙挽詞曰。卅載丈人行。問疾來過。坐榻爲言家裏事。明年元夜會。鑒詩又屈。畫燈誰助壁閒輝。黃懋謙字默園。編

建永福人。

傅增湘挽詞曰。等身著作虞初志。得意丹青雁蕩圖。

陳敬第挽詞曰。謗與大名俱。一代高文尊北斗。沒猶遺教在。卅年舊事說西泠。陳敬第浙江人。

劉廷琛挽詞曰。早歲以文名。游藝猶儕王石谷。乙科爲世重。謁陵私擬顧崑山。

林福熙挽詞曰。遷固大文章。陶鑄人才師道廣。巢由高氣節。葆存天爵後昆賢。

涂鳳書挽詞曰。詩宗正始。史采虞初。著作早爲文苑重。少慕郭未。老師顧絳。生平豈以畫名傳。

沈璿慶挽詞曰。登科不媿孝廉。鄭老還兼三絕畫。蓄念無忘忠愛。韓公本以匹夫師。

蕭方駿挽詞曰。舉世重清名。讀君文在前。識君面已滄桑後。一朝起廢疾。願我方有法。恨我身無造化權。按

方駿爲先生疾。篤時所延華鑒。又曰。湛深經術。寄託文章。祇說部談諧。已成痛哭傷心史。憑藉丹青。發摠忠憤。悵筆花零落。賸

有清貧賣畫錢。蕭方駿字龍友。四川三台人。

孫雄挽詞曰。孤寂冷紅生。逋峭柳州擅文筆。恩榮飛白記。艱貞箕子荷天褒。又曰。師嚴道乃尊。論著辨姦。飼

虎諸奴應媿死。自注。集中與蔡鶴卿唐芝書。均有益於人心世道。先生謂今之忝爲人師。事事曲徇其弟子意者。乃喂鷹飼虎之厮僕耳。豈人師哉。斯文天未喪。言能壽世。獲麟絕筆尙

如生。又曰。姦字有靈。能以苦心培植樸。離塵是福。不教老眼看刀兵。

魏易挽詞曰。是今高士。是古逸民。以文壇宿將。作學界導師。溯從遙譯新書。曾向名山分片席。不忘舊君。不

慕榮利。經滄海變遷。灑園陵涕泗。得此流傳。悼史。豈惟藝苑式遺型。魏易字冲叔。一字春叔。又字聰叔。浙江仁和人。

丁慕韓挽詞曰。其人若仙。惟靈素太素足比。邈世无悶。在伯夷希夷之間。丁慕韓福建人。

林振先挽詞曰。是名孝廉。力追古之人。幾度謁陵學炎武。眞外史氏。縱談天下事。百篇志怪續齊諧。

沈成鵠挽詞曰。爲諸弟名師。前輩讀書知有數。是先君諍友。孤兒剪紙想生平。

江天鐸挽詞曰。風標合擬林和靖。身世差同鄭所南。

鄭掄挽詞曰。辭辟謁陵。與傅青主顧亭林相頡頏。模範留後人。應有定評在月旦。恤貧念舊。比朱公叔劉孝

標更崖岸。針砭對澆俗。儘多高義迫雲霄。鄭掄福建人。

何啓椿挽詞曰。祖元珍機杼一家。豈與衆人同生活。鄭廣文才名三絕。且饒餘事作丹青。何啓椿字壽芬。福建閩侯人。

祝椿年挽詞曰。民國清遺老。今代古文家。祝椿年字隆庭。京兆宛平人。

鄭權挽詞曰。一生行誼性情。皆有獨至。豈廬文詩書畫。盡足以傳。鄭權字及里。居未詳。

張大椿挽詞曰。文似梅崖。詞似樊榭。小說似留仙。老去風流。猶有鄭虔三絕。官比竹垞。節比亭林。長齡比惜

抱。秋來搖落。如聞宋玉九歌。張大椿浙江人。

王立承挽詞曰。是畫家是詩家。是文家。閩嶠數英才。一代風流傷老輩。爲豪士。爲名士。爲逸士。春明編掌故。

千秋壇坫屬斯人。王立承四川人。

金紹城挽詞曰。居城市若山林。迂翁娛畫。鏤辭章於金石。虞氏著書。金紹城字輩北。浙江紹興人。

毓廉挽詞曰。停車宿涑水。醉寫梅花。十年道範常親。愛我直同胞弟。冒雪謁崇陵。跪澆柏樹。一旦忠魂不返。

小臣應見先皇。

項致中挽詞曰。漢經師。晉高士。志行在夷惠之間。清不絕俗。畫摩詰。書世南。性情得湖山之逸。歿猶爲仙。項致中字里未詳。

中字里未詳。

張大猷張大綸挽詞曰。何處不傷心。如許殘山時繞筆。頻年徒食力。空留野史更無亭。大猷字雲蔚。大綸字未詳。並福建閩侯人。

唐瀚波挽詞曰。墨藩徧人間。自是古文名家。亦偶爾寄意畫禪。寓言稗乘。布衣終牖下。究爲血性男子。更有

誰魂招杜宇。淚灑冬青。唐瀚波字及里居未詳。

許崇鑒挽詞曰。公眞天下第一流。吾戚梁文忠之言。可爲定論。世傳譯著逾百種。近代俞曲老而外。無與比

倫。許崇鑒字堅白。廣東番禺人。

劉映奎挽詞曰。窮愁方著書。至竟名山成大業。文士不治產。須知頗簾盡奇珍。劉映奎。福建江洲人。

關棠挽詞曰。望重經師。昔日提撕猶在念。俗輕國學。而今扶翼更何人。關棠見林氏弟子表。

林師望挽詞曰。匹夫傲王公。不淫不移不屈。守我初衷。終能濁世自清。何媿遜翁遺老。大隱在朝市。詩家文家畫家。本其餘緒。以此盛名相餉。尙爲皮相先生。

鄧宗淦挽詞曰。梁格莊前九度謁。陵留士氣越王臺畔。五更禱疾報親恩。鄧宗淦字里未詳。

聽花挽詞曰。韓柳文章垂百世。夷齊風度足千秋。聽花日本國人。

陳望雲挽詞曰。名成著述家。世增書畫價。尙留熱心綱常。八度謁陵戀舊主。不棄貧賤交。力爭文字種。何止囊傾濟賑。千秋仗義說先生。

齊璜挽詞曰。著述文章替人而鳴。才華高出一輩。丹青詩句。爲世所重。苦心流傳千秋。

侯毅挽詞曰。咫尺邈山河。太息廿年慳一面。遐邇識名字。卽論六法亦千秋。侯毅字雪農一字疑始江蘇無錫人。

羅忠文挽詞曰。矢志効孤忠。清代孝廉君特出。等身富著述。閩中名士世師資。羅忠文文字里未詳。

黃節挽詞曰。盧仝韓愈不在世。羨門安期相與遊。黃節字晦聞廣東順德人著有兼葭樓詩。

陳祖烈挽詞曰。自成一家言。瀛海異書歸著述。更饒不朽業。山川奇氣赴丹青。陳祖烈字里未詳。

林楷劉冰挽詞曰。碩望久從名筆著。清流到底布衣終。楷劉冰字林里未詳。

趙從軺挽詞曰。林和靖生作杭寓公。垂老尙餘詩筆健。陶淵明死稱晉徵士。後凋猶有菊松存。趙從軺字星垣江西南豐人。

李泰荃挽詞曰。節操生平不二文。藝當代無雙。李泰荃字革疑直隸陽源人著有中國史綱。

翁敬棠挽詞曰。効忠無分生平世。食力何妨作畫師。

鄭祖馨挽詞曰。愴向橫流弔逸老。但論餘事亦人師。鄭祖馨字里未詳

陳煥章挽詞曰。高文允已流傳。吾道大光萬載千秋三不朽。講席素蒙肩任。與人爲善。私情公誼共難忘。

施肇基挽詞曰。沒世以孝廉。昭法祇今餘畫稿。及門多賢達。文中猶待訂遺書。施肇基字植之。浙江某縣人。

王尙曾挽詞曰。與伯兄痛論時難。空望太平花。務觀已枯雙眼淚。爲遺老力持風節。瞻懷冬青樹。霽山應斷

九迴腸。王尙曾字里未詳

林錫光挽詞曰。易簣無私言。但以文章勗諸子。蓋棺有定論。咸推書畫是專家。林錫光字及里居未詳

謝哲勳挽詞曰。墮戶獨能全晚節。謁陵今又失遺臣。

孔教大學諸生挽詞曰。函丈聞文章性道一年。教澤繫懷思。力疾誨人無倦色。夏五授魏其武安列傳。音容

垂永久。畢生講學最終時。

黃濬挽詞曰。狂簡愧當年。兩函並爲談藝發。丹青成絕筆。一燈翻賴賭詩傳。

邵章挽詞曰。佳處戀湖山。此身那墮交蘆影。寓言寄詩畫。晚歲更叅黃蘗禪。

金梁挽詞曰。唯天能鑑孤忠。貞不絕俗。斯文萬無亡日。痛哉遺言。金梁詳林氏弟子表

沈觀冕挽詞曰。學行樹人倫。相期海內同聲。私與易名著貞節。簡書廁戎幕。太息寢門未逮。莫聆屬續詔。冰

淵。沈觀冕詳林氏弟子表

張國淦挽詞曰。文章從季世起衰。四百年中魏冰叔。心事爲前朝茹痛。十三陵畔顧亭林。

甘大文挽詞曰。粹學宗夏峯。賓海人師推第一。高文繼永叔。名山盛業足千秋。甘大文詳林氏弟子表

林長民挽詞曰。早歲及門。曾受史遷昌黎之文。算是平生得力處。隨時展畫。有傲石谷鹿牀諸作。從今遺墨

觸懷多。林長民詳林氏弟子表

繆承金挽詞曰。十餘年親炙門牆。薪盡火傳。每溯師承。嗟絕學。五色筆文章書畫。名高謗重。好留史乘。著公

評。繆承金詳林氏弟子表

李宣威李宜倜李宜璋李宜鉞挽詞曰。與先子結卅年刎頸摯交。此去倘相逢。話舊談心。應視昔。唯吾師紹

八代起衰盛業。斯文原未喪。呼兒書掌亦奚勞。李宣威諸人詳林氏弟子表

高翀漢郭步瀛挽詞曰。言可傳。行足法。絳帳高懸。一代儒宗光勝國。當今世喪斯文。素車共挽。三千弟子哭

先生。高翀漢郭步瀛詳林氏弟子表

王之棟挽詞曰。溯從游太學。共跂人師。倫理本常談。祇經善誘循循。妙緒紛披聽不倦。悵遠阻京華。猶親手

澤。衰秋來噩耗。自愧浮生碌碌。高山失仰。憾何窮。王之棟詳林氏弟子表

劉元騏挽詞曰。遺文獨有千秋。滿腔忠孝。襲三集。謁陵凡經九度。當代衣冠弟一流。劉元騏字及里居未詳

陳宗蕃挽詞曰。愛國愛君。愛子愛親。更愛朋友門生。天下望高風。忽爾泰山其頽。吾將安仰。工詩工詞。工書

工畫。尤工古文小說。萬篇皆餘事。諒此多能天縱。誰當繼之。陳宗蕃詳林氏弟子表

董餘慶挽詞曰。是一代文豪。當年問字龍潭。如仰斗山韓吏部。爲八閩師表。此日駟車燕市。每傷巾帶郭林

宗。黃餘慶見林氏弟子表

劉盟訓挽詞曰。教澤感人深。猶記督學中州。愛惜身名曾命我。文章關世變。試讀籲天諸錄。發揮道義足傳

公。劉盟訓詳林氏弟子表

李壯飛挽詞曰。奇氣入稗官。秀氣入畫史。正氣入書家。博學更多能。道繼聖人慚一體。早歲爲游俠。壯歲爲

名儒。晚歲爲隱逸。修名長不朽。心喪弟子痛三年。李壯飛詳林氏弟子表

李宜倜挽詞曰。平生好游俠。餘事擅稗官。李宜倜詳林氏弟子表

義胃挽詞序曰。吾師生平自強不息。今春忽夢其歸道山矣。哭之慟而覺。咽鳴中。溯憶夢寐挽詞。得二言。竟

未忘一字。明日書以告。乃發長牋。自謂日益健碩。無死徵也。曰。吾之憂切魂夢。猶杜甫之于李白。未嘗以爲

不祥。今則竟爲不祥矣。慟哉。慟哉。詞曰。師逝誰知己。文傳古大人。義胃常聞先生曰。生平敢自信者。唯文而已。其冲虛之量。誰復逮之。

林瑜挽詞曰。賤子受卵翼數十年。若責報恩真無地。病榻侍湯藥將百日。終焉長逝狂呼天。林瑜先生姪也。

女弟子顧孫誦周挽詞曰。一卷寫茶花。自是好詞均絕妙。九原見吾祖。爲言感舊已成圖。孫誦周詳林氏弟子表

女弟子施秉端挽詞曰。佳弱附饘堂。若論六法傳燈。畫本敢忘師石谷。淒涼陳絮酒。最感隆情焚券。練裙差

免困京華。施秉端詳林氏弟子表

朱桂挽詞曰。當日敢謂事人以忠。盡分感恩酬國士。自古得逢知己無憾。檢書灑淚哭先生。朱桂京兆大興人。先生僕也。○以上

錄挽詞。都百有五首。

張大綸諫序有句。如文章乃其餘緒。風義追於往古。馬遠生當南渡。問山水其何時。顧絳累謁思陵。雖開關其未已。至若柳下一諾。久要不忘。竹林能狂。權貴褻魄。要其細行。胥以風世。諫辭有句。如身隱朝市。心樂衡泌。裴垪筆疏。魏舒襪被。按此諸語皆尚切符先生生平。

張恩熊張恩龍祭文有句。道宗孔孟。學究天人。窮年兀兀。著述等身。爲書百七十五萬言。上下古今。蠻風恣行。鄙語曰新。六經覆瓿。將喪斯文。夫子怒憂。移書子民。大聲疾呼。氣振乾坤。發迷糾繆。天下仰聞。今夏五月。授我遷史。曰文之道。咸在斯矣。

滿洲人毓義毓瀛挽詞。有憶昔時連喪父兄。弱息哀哀。能我恤之語。

林曜樞挽詞。有感我師情如父母之語。先生性情感人深矣。○林曜樞見林氏弟子表。

陳迷挽詞有句。公嘗自言隱於舉人七十年。此言吾亦常聞之也。○陳迷見林氏弟子表。

王永圻王永旻挽詞。有父執閔孤兒。湖社及門。先淚盡之語。於此見楊峻夫劉鵬撫孤是慣事之言。○王永圻王永旻皆見林氏弟子表。

閩人劉鵬楊峻夫皆先生姪婿。其挽詞有撫孤是生平慣事。教養何止一家人。此與二王之聯。皆爲紀實之語。○劉鵬楊峻夫皆見林氏弟子表。

鄭孝胥鄭孝樸挽曰。志存衛道。以上編錄祭挽語句。都八則。